

# *EDENE YA SATANE*

 Ha re inameng. Modimo o ratehang, re O thabetse bosiung bona ka monyetla o moholo ona, ho tla hape ka Lebitso la Morena Jesu, ho kopana le sera sa rona, sera sa Hao, kantle mona lepatlelong la ntwa; ka Lentswe, ho se leleka hara batho ba Hao; ba tle ba bone, bosiung bona, Morena, Lesedi la Evangel. Ke rapella hore O tlotse mahlo a rona ka setlolo sa mahlo, a tle a tutubollelw Nnete; re tle re tlohe mona, re re dipelong tsa rona, “Na dipelo tsa rona di ne di sa tjthese ka ho rona ha A ntse a bua le rona tseleng?” Fodisa ba kulang le ba hholokofetseng. Kgothatsa ba nyahameng. Phahamisa matsoho a fokolang a neng a leketla. Re ke re shebe Ho Kgutla ha Morena Jesu, etswe re dumela ho le haufi. Re kopa sena ka Lebitso la Jesu. Amen.

Le ka dula.

<sup>2</sup> Ke tla leka ho ba mokgutshwane bosiung bona, hobane kea tseba ba bangata ba tswa dikarolong tse fapaneng tsa na, ho... bakeng sa tshebeletso; kapa ba ile ba sala, ba bang ba lona, mme le lokela ho kgutlela morao, mohlomong ho kgutlela hole. Mme ke a le leboha. Hoseng hona ke ne ke batla ho utlwa Moena Neville, ka bona. Mme ke mo utlwile hangata, mme ha ke eso mo mamele nako efe feela ke sa mo thabele. Empa hoseng hona, molaetsa o kgemang le dinako oo, kea tseba hobane ke tsamaisitswe ke Morena ho o mamela hoseng hona. Motle haholo! Mme kea bona hobaneng le rata ho tla le ho mo mamela, le lona. Mme o tla le thabisa kamehla, ke tiile, ho mo mamela.

<sup>3</sup> Ke lekile ho finyella tse ding tsa dikopano tsa ka tsa puisano kajeno; hoseng hona le thapama ena. Ke sa saletswe ke tse ngata, ngata tse tlang. Mme ke...

<sup>4</sup> Jwaloka, kea kgolwa, e ne e le Jethro ya boleletseng Moshe ka nako e nngwe, ho re, “O imetswe haholo.” Kahoo, re na le baena ba bangata mona mabapi le mathata a lona. Mme bo bong le bo bong bo ne bo tshwaneleha, mme ke dintho tse kgabane tse qosang ho elwa hloko. Mme nka le laeletsa modisa wa rona, kapa Moena Mann, le baruti ba bang ba Tumelo ya rona mona. Le ka ya ho bona. Ba tla le bolella ka nepo se ka etswang; batho ba bang, bana ba bona; ho nyallana, kapa dintho tse phoso. Mme banna banna ba ka le thusa sek a-e mang kapa mang, hoba ke bahlanka ba Kreste. Mme le ye ho bona, mme ke tiile ba tla—ba tla le fa thuso e le e hlokang. Nka sitwa ho di finyella tsohle. Di ngata hona, hohle moo o yang. Di ntse di phaellana hodimo le hodimo, le a bona. Mme o batla ho finyella bo bong le bo bong, empa o ke ke wa kgona. Empa ke rapela Modimo kgafetsa, hore ka mokgwa o mong, a tle a le rarollele wona hantle.

<sup>5</sup> Jwale, bosiung bona, re batla ho ya Lengolong, mme re bale karolo ya Lengolo ho Genese, kgaolo ya 3; mme re lebise moraonyana dinthong tseo esale re bua ka tsona, nakong tse fetileng, mme re bone ha eba Morena Jesu a fela a tla re ekeletsa haholwanyane hodima seo re tla se tseba ha re tswa. Ke rapela—rapela hore A ho etse.

*Noha e ne e feta ka bohlale diphoofolo tsohle tsa naha tseo JEHOVA Modimo a di entseng. Mme ya re ho mosadi, A efela, Modimo o itse, Le se ke la ja difate tsohle tsa tshimo na?*

*Mosadi a re ho noha, Re ka ja ditholwana tsa difate tse tshimong:*

*Empa haele ditholwana tsa sefate se hara tshimo, Modimo o itse, Le se ke la di ja, mme le se ke la di ama, hore le tle le se ke la shwa.*

*Noha ya fetola mosadi ya re, Haela ho shwa le ke ke la shwa:*

*Modimo o mpa o tseba hobane mohla le di jang, mahlo a lona a tla tutuboloha, mme le tla ba jwalo ka medimo, le tsebe botle le bobe.*

*Mosadi eitse ha a bona hobane sefate se monate ho jewa, mme se kgahlisa mahlo, mme se lakatseha ke ho hlalefisa, a nka ditholwana tsa sona, a di ja, me a nea monna wa hae ya nang le yena; mme le yena a ja.*

*Yaba mahlo a bona ba babedi a tutuboloha, ba tseba hobane ba feela; mme ba rokahanya mahlaku a sefate sa feiye, ba iketsetsa meitlambo ka wona.*

<sup>6</sup> A Morena a ekeletse...mahlohonolo a Hae palong ya Lentswe la Hae. Jwale ke rata ho qotsa mohlodithero bosiung bona, ho tswa mono, le ho bitsa: *Edene Ya Satane*. Nthwana e mahaila ho ka e bua, ya, *Edene Ya Satane*. E batla e bapa, le bosiu ba Sontaha se seng, kea kgolwa, mohla ke ne ke bua mona le lona ka *Sefe Ya Monna Ya Kelello*, le tatso ya monna ya halalelang.

<sup>7</sup> Mme ka nako tse ding polelwana tse mahaila tsena di re fihlisa nthong e nngwe; e etsa re bale, le ho etsa hore le ithute Lentswe. Mme ke seo ke batlang phutheho ya ka yohle e se etse. “Motho a ke ke a phela ka bohobe feela, empa le ka Lentswe ka leng le tswang molomong wa Modimo.” Kahoo, balang Lentswe; le ithute Lona. Mme le ithute Lona ka mahlo a Modimo, ho fa bohlale ba lona kutlwisiso mabapi le kamoo re lokelang ho phela tsatsing lena la jwale.

<sup>8</sup> Jwale ho theoha, bosiung bona, ho bua le lona feela, ho re, “Tjhe, nka etsa sena kapa sane,...”

<sup>9</sup> Ke rata ho bua le batho, ha kaa ka ke rata ho ya lapeng le e mong le e mong wa lona bosiung bona. Ke... Modimo o a tseba

ke nneta. Nka rata ho ya hae le e mong le e mong wa lona, le—le ho ja—ho ja borakefese le lona hoseng, le—le—le ho tswa le ho ya tsoma mesamane hosane thapama, lea bona. Ke—nka rata ho etsa jwalo, empa ke—ke sitwa ho etsa seo. Mme ke rata ho ya hae mme ke dule fatshe feela le ho qoqa le lona; ho dula mathuleng ka mora tshebeletso, mme ke qoqe le lona nakwana, ho bua le lona ka thekolohelo ya lona le ka Modimo. Nka rata ho etsa jwalo. Banna le basadi ka mona; Modimo o a tseba ke rata ho etsa seo, empa nke ke ka kgona. Le a bona, ho na le kgulo e kalo—e kalo le mokgathala.

<sup>10</sup> Mme—mme mongwaheng ona wa methapo oo re phelang ho wona... Mme ke motho wa methapo, ka bona. Kajeno nka qeta le mohopolo waka ho etsa ntho, “Ke loketse ho e etsa feela,” mme hosane e hole le nna ka dimilione tsa dimaele; ntho e nngwe e se e kgaoleditse le ho etsa *sena le sane*. Mme o fumana nako, ho leka ho tsepamisa kelello ya hao.

<sup>11</sup> Empa sehlohlolo sa katileho ya ka ke ho bolela Evangelici Kereke, le ho etsa sohle seo nka se kgongang ho isetsa Jesu Kreste tlota tsatsing lena, ke sa le lefatsheng mona, le nako eo ke saletseng ke yona lefatsheng. Ke tlela ho—ho leka ho le bolella ho tla le thusa; ho hong. Ke badile hoba ke fihle lapeng hoseng hona. “Nka bua’ng bosius bona, Morena, e ka thusang batho bao?”

<sup>12</sup> Ka ho mamela molaetsa o matla oo hoseng hona ka... Moena Neville a re tliseditseng wona, mabapi le... Ka hopola o ne o babatseha, kamoo a buileng mono, “Ngaka e ye e hlahlabe lefu; empa motho ya tlang ka sejana se tletseng dinalete, ke yena ya hlabang nalete.” Ka hona ka hopola e bile e—e tlhahiso e kgabane. Ka nahana ka ntho eo, “sehlare, hoba lefu le hlahlajwe.” Kahoo ke ntho e ntle haholo eo.

<sup>13</sup> Ke batlide ho bua le lona ka ntho, ho tlisa ntho e nngwe ho le edisetsa tshepiso ya Modimo ya mongwaha ona. Le a bona? Ntho, e seng seo motho a kileng a ba sona tsatsing le leng, empa ntho... mme ha... Dintho tseo di itoketse; bohole re lebisa tabeng tseo. Empa ka hopola ho leka ho tlisetsa kelello tsa lona taba, ka Mangolo ana ke a ngotseng mona, e tla le bonesetsa, ho tseba, ho le fetola lesole le molemo ho feta lepatlelong leo le lwanang ho lona jwale; ho ithuta mawa a sera, le tle le kgone ho thiba sohle pele se fihla ho lona, lea bona. Ke yona ntho ya sehlajwe, ke ho ithuta ho phoka e—e ditebele, haholo ka moo o ka kgongang.

<sup>14</sup> Jwale, a re shebeng nthohadi ena... metsotso e mmalwa, letsatsi le leholo lena, la sebe leo re phelang ho lona jwale. Ha ke dumele ho bile le letsatsi leo ke badileng ka lona historing... Ho kile ha fihla matsatsi a maholo a tlatlapo, mohla bana ba Modimo ba bolawang ka mahlakoreng wohle. Empa ho bona thetso ya sera, ha re eso be le letsatsi le kang

lena leo re phelang ho lona. Ke letsatsi le masene, le thetsang ho feta. Mme ha ke bona seo, ho fihla taba ena, hore, kajeno Mokreste o lokela ho ema ka ditshetshekwanne ho feta kamoo a kileng a etsa mongwaheng ofe feelsa.

<sup>15</sup> Jwale, morao mehleng ya tlatlapo, ya Roma, Kerekeng; Mokreste ha a etsa phoso, o ne a kena areneng le ho feptjwa ditau, kapa ntho e jwalo, hoba ba mo fumane e le Mokreste ka bopaki ba hae. Empa moya wa hae o ne o bolokehile, hoba e ne e le modumedi ya hlwekileng, ya sa silafalang ho Modimo, mme a tiise bopaki ba hae ka thabo ka madi a hae. Enere ha methapo e lokoloha, kapa masoba mmeleng wa hae, le madi a fopha, a meketse, ka tumelo ya mnete e tshepehang, le ho re, “Amohela moya wa ka, Morena Jesu!”

<sup>16</sup> Empa, jwale, masene a diabolose jwale, o etsa batho ba dumele e le Bakreste athe ha se bona. Ke yona taba. Ha o hloke ho tiisa . . . Ke—ke letsatsi le bolotsana ho feta kamoo ho ka kgonehang, ho feta mohla o ne o lokela ho tiisa bophelo ba hao—ba hao ka bopaki ba hao. Diabolose o tjhehile leraba ka leng le bolotsana a ka le kgonang, ho . . . Ke mothetsi. Mme Jesu o re boleletse, ho Matheu 24, ka moo letsatsi lena leo re phelang ho lona le tla ba kateng, letsatsi le bolotsana ho feta le kileng la phelwa, “ho bapa ho ka thetsang le bona Bakgethwa ba Modimo hola a ka kgona ho thetsa.”

<sup>17</sup> Jwale a re bapiseng Mangolo a mang, kapa boporofeta bo builweng ka Bibeleng, tsa kajeno, le ho e bapisa le tsatsi leo re phelang ho lona jwale.

<sup>18</sup> Ho Timothea wa Bobedi 3, re ithuta sena, hore moporofeta o boletse, ho re, “Mehleng ena, batho e tla ba bahalefi, bakaki, ba ratang menate ya nama ho feta Modimo.” Bapisang hono jwale, motsotso feelsa. Re ke ke . . . Re tla e kgutsufatsa feelsa, hoba re se na nako e kalo ho haola ka yona yohle kamoo re lokelang ho e nka; empa ho e hlaba dihlooho, le tle le bone ha le fihla hae le ho ithuta yona. “Bahalefi, bakaki, ba ratang menate ya nama ho feta Modimo; ba se nang ho tshepeha, ba etseletsang ba bang, ba sa tsebeng ho itshwara, le ba hloyang ba molemo.” “Jwale Moya o buile o omela hore dintho tsena di tla hlaha mehleng ya morao.” Ke mehla ena, seporofeto se bua ka yona.

<sup>19</sup> Jwale re a bala, hape, ho Ditshenolo . . . 14, Ditshenolo 3:14, ke rialo, Mongwaha wa Kereke ya Laodisea, kamoo kereke e tla ema kateng mongwaheng wona wa ho qetela. Mme e tla ba, Le re, “E tla dula jwaloka mohlolahadi mme e sa hloke letho. E—e ne e ruile, mme e le mononi, mme ba sa tsebe hobane ke mafutsana, ba madimabe, ba soto, difofu, le ba feelsa, mme ba sa ho tsebe.” Jwale, hopolang, O bua le kereke ya mongwaha ona, “soto, sefou, feelsa, mme ha o tsebe.” Polelo ya ho qetela, Lentswe leo la ho qetela, ke lona le e tsotisang. Ba inka ba

tletse Moya hantle ka mahohle, ba itokisitse ka hohle. Mongwaha wa Kereke ya Laodisea ke Mongwaha wa Kereke ya Pentekosta, hoba ke mongwaha wa ho qetela wa kereke. Luthere o bile le molaetsa wa hae; Wesele o bile le molaetsa wa hae; le Pentekosta e bile le molaetsa wa bona.

<sup>20</sup> Hape, E boletse, ho re, “Ereka ha o le fofo, o sa tjhese kapa o sa bate,” maikutlo a ka ntle, mohopolo wa kelello wa Evangelii; “hobane,” O itse, “o le jwalo, Ke tla o hlatsa molomong wa Ka.” Ka mantswe a mang, ha Mo kudisa ho bona kereke e le maemong ao.

<sup>21</sup> Mme, le hopole, ba ne ba Mo hlatsitse; mme A le kantle ho kereke, a leka ho kgutlela kahare, Mongwaheng o mobe oo wa Kereke ya Laodisea.

<sup>22</sup> Modimo wa lefatshe lena kajeno, motho ya kgumamelwang wa ‘fatshe lena la kajeno, ke Satane. Mme batho ha ba lemohe hobane ba rapela Satane, empa ke Satane o ikgakantse jwaloka kereke, lea bona, jwaloka kereke. Ba kgumamela Satane, ba ntse ba hopola hobane ba kgumamela Modimo ka kereke, empa ke kamoo Satane a e sebeditseng kateng.

“Oh,” o re, “empa be butle motsotso; re rera Lentswe.”

<sup>23</sup> Ako shebeng morao mona mohloditherong wa ka, bosius bona. Satane ke yena ya qadileng ho borella Eva Lentswe, pele, “Modimo o itse,” le a bona.

<sup>24</sup> Ke tshokamiso ya karolo ya Lengolo e lebahanang le letsatsi leo. O tla o borella hobane sohle se Jesu a se entseng se ne se lokile ka ho phethahala. O tla o borella hobane sohle seo Moshe a se entseng se ne se lokile ka ho phethahala. Empa ha o nka ditshepiso tseo Ba di fileng tsatsi lena, eba ntho Eo e ne e lebisitswe mongwaheng o mong. Ke phetto seo a lokelang ho se etsa, lea bona, ke ho etsa hore batho ba Le dumele jwalo, mme hoo—hoo ke phetho. Hoba, “O ke ke wa tlosa Lentswe le le leng ho Yona, kapa ho eketsa lentswe le le leng ho Yona.” Empa ke seo a se etsang.

<sup>25</sup> Batho, ho kgumamela Satane ba sa lemohe, ba hopola ba ntse ba kgumamela Modimo; jwaloka ha re lauwa ke seporofeto, ho Bathesalonika ba Bobedi. Hoo, ha re hle re se baleng, Bathesalonika ba Bobedi, kgaolo ya 2. Ha re e nkeng motsotso feela, ha nka kgona, hang—hang. Ke rata ho bala seo. Feela, kea kgolwa, Bathesalonika ba Bobedi. Ke tshwere Lengolo mona. Ho ba Bobedi...

*Haele tsa ho tla ha Morena Jesu...le tsa ho  
phuthehela ho yena, rea le rapela, banabeso,*

<sup>26</sup> Jwale, bonang, “ho tla ha Morena, le ho phuthehela ho Yena,” jwaloka ha Modimo o tla bokella batho ba Hae ho Yena mehleng ya qetelo. “Ho phuthehela ha batho ho Morena,” e sang ho kereke, “ho Morena; ho phuthehela mmoho ho Yena.”

*Le se ke la phaka la sisinyeha pelong tsa lona,  
kapa...tshoha-tshoha, ke moyo, mohlomong...  
polelo, kapa lengolo leo ho thweng le tswa ho rona,  
le...letsatsi la Morena le haufi.*

*Le se ke la thetswa ke motho le ka mokgwa o le  
mong: hobane e ka kgona ho hlahe kweneho pele, mme  
ho hlahe motho eo wa sebe (“motho wa sebe,” elang se  
a leng sona hloko jwale), ho hlahe monna wa sebe,  
mora tahleho,(e ne e le Judase eo, lea bona);*

*Ya hanang le ya iphamisang hodima hohle ho  
bitswang Modimo, leha e le ho kgumamelwang; mme o  
tla dula jwalo ka Modimo tempeleng, a ipeile Modimo.*

<sup>27</sup> Thetswo eo ya kereke ya kajeno! Le a bona, “mora tahleho,” diabolose. “Mora tahleho,” diabolose. Ebe moo, batho ba kgumamelang Satane tsatsing lena, ba hopola hobane ba ntse ba kgumamela Modimo. Empa ba mo kgumamela ka tumelwana, mokgatlo o entsweng ke motho le ditumelwana tse kentseng batho hantle thetsong e kgolohadi eo lefatshe le kileng la e tseba. Ho sa tsotellehe Lentswe la Modimo le tshepisitsweng tsatsi lena, le rerwa le ho netefatswa ha kae, ba ntse ba sa tlo Le dumela. Ba ke ke ba Le dumela.

<sup>28</sup> Ebe ke hobaneng? Rea ipotsa lebaka. Hobaneng e sa kgongahale; horeng ba sa Le dumele? Athe Modimo o boletse A tla etsa ntho e itseng, mme O a e etsa, mme leha ho le jwalo ba e fa diholoholo tsa bona mme ba e furalle. Jwalo feela ka ha Eva a tsebile hore seo Modimo a se buileng, Modimo o tla se etsa; empa a se fa seholoholo sa hae, ho mamela seo a ne a tla se bua.

<sup>29</sup> Hopolang feela, mengwaheng e meng, e bile ntho e tshwanang. Mongwaheng ka mong, esale e le Satane a leka ho ba kgopamisetsa Lentswe leo, ho etsa hore ba bone mongwaha o mong osele.

<sup>30</sup> Shebang, mohla Jesu a ne a fihla, bonang, Satane o ne a kene sehlopheng seo sa baruti ba Bajuda, le borabbi le baprista, a leka ho ba bolella ho boloka molao wa Moshe, athe lona Lentswe le boletse Mora motho a tla senolwa ka tsatsi leo, lea bona, hore O tla Itshenola. Ka hona ba ne ba leka, ha feela ba ne ba ipolokile e le barapedi, le molaong wa Moshe. Le bona seo a se entseng? O ne a leka ho ba bolella, “Karolo eo ya Lentswe e nepile ho nepa, empa Monna enwa ha se Motho eo.” Le bona kamoo a thetsang? Ke lona tsatsi leo la thetso ya mannete.

<sup>31</sup> Esale ho le jwalo, le jwale ho jwalo, Satane o thea mmuso wa hae lefatsheng. O e etsetsa lebaka leo hantle, hobane o batla ho thea mmuso wa hae.

<sup>32</sup> Jwalo ka rakgwebo, eo ha se Mokreste, o tla etsa mawala wohle a ka a kgonang ho o bontsha ntho ka mokgwa o phoso.

Ha eba a na le—le sepheo le ho ithuisa ka ho o etsisa yona, ho o bontsha yona ka tsela eo, o tla o bontsha ntho yohle a ka e kgonang, le ho o phoka nneteng ya yona, hobane o inahanel a a nnotshi. Ho sa tsotelehe o thetsa hakae le ho qhekanyetsa, le eng hape, o a ithuisa.

<sup>33</sup> Mme ke ka hona Satane a entseng hona. Mme o sebedisitse tshebetso ya lenseswe ho e etsa, jwalokaha Modimo a tshepisitse hore o tla etsa. Jwale, o qadile ka thetso ya borapedi Edene, mme esale a tsweletse ho tloha mohlang oo.

<sup>34</sup> Eseng ka ho hloma mphi ya makomonisi. Makomonisi ha amane le taba ena ka letho. Ke kereke, ke hona moo le lokelang ho bea leihlo, le a bona. Ha se—ha se makomonisi a neng a tla thetsa le bona Bakgethwa. Ke kereke e tla thetsa le bona Bakgethwa, le a bona. Ha se makomonisi; rea tseba ba latola Modimo, mme ba antikreste, ehlide ba jwalo, ho bua nnete, empa ha se *yena* antikreste. Antikreste o tletse borapedi, o tletse borapedi haholo, mme a ka qotsa Lengolo, le ho Le hlakisa ha kalo.

<sup>35</sup> Jwalokaha Satane a entse morao tshimolohong, a qotsa ntho yohle ho fihla tlase hantle, “Modimo o itse, ‘Le se ke la ja sefate se seng le se seng sa tshimo.’” Le a bona, ho Le qotsa hantle ka nepo.

<sup>36</sup> Mosadi a re, “E, re ka ja difate tsohle tsa tshimo, empa sefate se teng hara tshimo seo Modimo o itseng se se ke sa jewa, hobane, esita le ho se ama; hoba, mohla re etsang jwalo, re tla shwa mohlang oo.”

<sup>37</sup> A re, “Oh, ruri le ke ke la shwa. Empa a nke ke o fe lebaka la hobaneng Modimo a itsalo, ke hobane . . .” Le a bona, ke eng jwale? O qotsitse Nnete ena, le a bona. A re, “Se tla le tutubolla mahlo, mme se tla le tsebisa botle le bobe. Le tla ba jwaloka Modimo, ha le ka e etsa.”

<sup>38</sup> Ke seo a batlang ho se etsa ka nepo, mme ke seo a lekang ho se etsa kajeno. Esale thetso ya borapedi e le teng ho tloha tshimolohong Edene, mme esale ho le jwalo. Nakong ya Adama, e bile thetso. Nakong ya Noe, e bile thetso. Nakong ya Jesu, ho ne ho tshwana. Mme ho a tshwana jwale, mokgwa o tshwanang, thetso ya borapedi!

<sup>39</sup> Jwale, re tla lemoha lefatshe, mohla Modimo a ne a le beile tlasa taolo. Jwale, mohla Modimo a na nkile taolo . . . a le beile taolong ya Hae. Eitse ha Satane a nka taolo, ka ho latola Lentswe la Modimo. Modimo o kile a bea lefatshe taolong ya Hae. A le tsepamisitse phikolohong ya lona. A le beile, ho le sebedisa. A etse tsohle, le le taolong ya Hae. Jwale re tla bapisa hoo le ka mora hoba Satane a nke taolo ya lona.

<sup>40</sup> Jwale, ho nkile Modimo dilemo tse dikete tse tsheletseng. Ha ho a Mo nka nako e telele hakaalo, empa O nkile nako e

kaalo. Dilemo tse dikete tse tsheletseng, hoba re rutwa hore “letsatsi le le leng Lehodimong ke dilemo tse sekete lefatsheng,” mme e se e le dilemo tse dikete tse tsheletseng, kapa matsatsi a tsheletseng Modimo a hahile lefatsheng. Jwale, ho nkile Modimo dilemo tse dikete tse tsheletseng ho le thea, ho le jala dipeo tse lokileng le ho etsa ntho e hlahise se sa yona. Ntho yohle e tshwanetse ho tswa mofuteng wa yona. Dipeo tsohle tsa Hae di ne di lokile, mme kahoo di tshwanetse ho hlahisa se sa tsona. Modimo wa nka dilemo tse dikete tse tsheletseng.

<sup>41</sup> Qetelong, hoba A etse tsohle, mme pheletsong re... pheletsong la fihla ka ntlokgolo ya lona, ya lefatsheng, seratswaneng se setle se ikadileng botjhabela ba Edene, se bitswang tshimo ya Edene. Modimo a hloma ntlokgolo ya lefatsheng tshimong ya Edene, Egepeta, ntlokgolo e ntlhaneng e ka botjhabela ba tshimo hantle.

<sup>42</sup> Mme hodima maemo wohle, A bea mora wa Hae le mosadi wa mora Hae, hodima yona yohle. Ke hantle. Ke seo Modimo a se entseng. A ba beile bolaoding bo tletseng. Ba ka bua le meya, mme e kgaotse ho foka. Ba ka bua le sefate, mme se tlohe *mona* ho ya *mane*.

<sup>43</sup> Tau le phiri di fula mmoho, mme konyana e botha le tsona. Bobe bo le siyo. E le kgotso e phethehileng, kutlwano e phethehileng, ntho yohle e le phethahalong, homme mohla Modimo a ne a le beile bolaoding ba Hae. Mme lemohang, A fumana ntho ya Hae... A fumana lefatsheng la Hae, A beile tsohle di sebetsa. A tlisa ntho e nngwe le e nngwe. Tsohle di ja meroho; ho se letho le shwang, ho se letho le ka senngwang, ho se letho le ka silafatswang. Le letho... Le phethahetse feela.

<sup>44</sup> Mme hodima hoo hohle, A bea bana ba Hae ba ratwang, mora Hae le moradi wa Hae, monna le mosadi, ho le laola.

<sup>45</sup> Modimo o na kgotsofetse hona! “Mme A phomola mesebetsing ya Hae yohle, ka tsatsi la bosupa,” le ho Ikgalaletsa sabatha ena ya letsatsi la bosupa.

<sup>46</sup> Hobane, Modimo a le lekola kaofela, hoba A qete dilemo tse dikete tse tsheletseng a le bopa le ho le lokisa, ho le etsa; le ho hloma dithaba, le hore divolkano di sututse dithaba, le dintho tse hlahileng ho ropoheng hoo; ho le omisa, le ho le lokisa ka moo A entseng. Mme e le tulo e ntle.

<sup>47</sup> Ho se letho ntho e kang lona, diparadeisi tse kgolo tsa Modimo! Le di dinosaur tse kgolo, le ntho e nngwe le e nngwe, di hahaba hodima lona, le diphoofolo tse kgolo; ho se kotsi ho tsona. Di bonolo ba ledinyane la katse. Di le se na letho ho hang; ho se—ho se bolwetse, ho se hlomoho; ho se le kokwanahloko e le nngwe lefatsheng. Oh, sebaka se se kakang!

<sup>48</sup> Dinonyana tse kgolo di thankga ho tloha sefateng ho ya sefateng, mme Adama a ka di bitsa ka lebitso, mme di ka fofela mahetleng a hae le—le ho mminela. Mme, oh, e le sebaka se se ka kang seo Modimo a na ena le sona!

<sup>49</sup> Mme yaba ho etswa se seng sa dimelo tsa boleng ba Hae ho tswa Mmeleng wa Hae ka Sebele. Modimo o na le dimelo tsa boleng Mmeleng wa Hae.

<sup>50</sup> Jwalokaha, le wena o le boleng ba ntatao. Mme, lea eellwa, o ne o le ka ho ntatemoholo wa ntatemoholo wa ntatemoholo wa hao. Empa, ka mono, ha re re, re e theolele jwalo ka ho wena le ntatao. Jwale, o ne o sa tsebe letho mohla o leng ka ho ntatao. Peo ya bophelo e tswa ho e ton. E ton e na le sele ya madi; mosadi o na le—le lehe; jwale, ka baka leo, sele ya madi e na le bophelo ka ho yona. Mme, hape, mohla o no le ka ho ntatao, hantle-ntle o ne o sa tsebe letho ka yona. Empa, leha ho le jwalo, mahlale le Lentswe la Modimo di paka hore o no le ka ho ntatao, empa o no sa tsebe letho ka yona.

<sup>51</sup> Empa yaba moo ntate a lakatsang ho o tseba. Mme ka kopano ya kamano le mme, wa ntoo tsebiswa ntate. Jwale, o boleng ba ntatao. O tshwana le yena, mme o na le dikarolo tsa mmele tse tshwanang le ntatao.

<sup>52</sup> Jwale, Modimo o ne a le jwalo tshimolohong. Mora e mong le e mong wa Modimo le moradi e mong le e mong wa Modimo o ne a le ho Modimo tshimolohong. Ha o hopole jwale, empa o no le teng mono. Yena o e tsebile. Mme A o batla o le mokgweng oo A ka o amang, ho bua le wena le ho o rata, le ho tsukutla matsoho a hao.

<sup>53</sup> Na ha o batle moshanyana wa hao ka sebele...Na hase tsatsi le leholo mohla mora hao a ka tleng hae le ho dula fatshe tafoleng? Ha a tswa lebaleng la ntwa, kapa ntho e nngwe, a le maoma; kamoo o ka lokisang tinara; o hlabe namane e nontshitsweng, kapa eng hape, mme o mo lokisetse! Ke nama le madi a hao ka sebele, mme o ne a le ka ho wena. O no o sa mo tsebe mohlang oo, empa wa tseba hore o ne a le teng.

<sup>54</sup> Mme ka hona Modimo o tsebile re tla ba teng mona, empa yaba O re bea nameng re tle re angwe. Hore A tle a kgone ho ama, A fetoha e mong wa rona mohla A fetohang Jesu Kreste, Mora Modimo ka Boyena, bottlalo ba boiponahatso ba Modimo. Ka hona oo e ne e le morero wa Modimo, ho pepesa tsa boleng ba Hae kopanong.

<sup>55</sup> Ha ke sa le ka ho ntate, ha kea tseba letho ka yona. Empa mohla ke fetohang mora wa hae mme ke tswalwa ke yena, ka fetoha boleng, karolo ya ntate. Le wena o karolo ya ntatao.

<sup>56</sup> Mme jwaloka bana ba Modimo, re karolo ya boleng ba Modimo bo nong bo le ka ho Yena, bo entsweng nama jwalokaha A entswe nama, re tle re be le kopano ya setswalle e

mong le e mong, jwaloka lelapa la Modimo hodima lefatshe. Mme seo e ne e le sepheo sa Modimo tshimolohong. E, monghadi. Ke seo Modimo a ne a se batlile tshimolohong.

<sup>57</sup> A beile tsohle taolong. Mme A lokolla motho hodima tshimo ya Edene, tlasa bolokolohi ba kgetho; ho re, "Mora, ke ya hao."

<sup>58</sup> A sebaka se setle! Modimo a kgotsofetse hona, A ba a kgutla le ho phomola mesebetsing ya Hae yohle. Sefate ka seng se sa bee ditshehlo le meutlwa. Ho se menokotshwai e tswang sefateng sa meutlwa. Ntho yohle e phethahetse. Dipeo tsohle di phethahetse. Ntho yohle e le maemong a phethahalo.

<sup>59</sup> Yare A sa phomotse nakwana, sera sa Hae sa nyonyoba ka mano, le ho nka taolo, ka ho tolokela bana ba Hae lenaneo la Hae hampe. Athe, O na beile tshepo ngwaneng wa Hae ka Sebele; jwalokaha o bea tshepo hodima moradi wa hao ha a tswa le monna bosiu; ha o bea tshepo hodima mora hao ha a lokela ho tsamaya le moshanyana ya nwang kapa moshanyana ya tsuabang. Lea bona, A bea tshepo hodima mora Hae, hore a ke ke a etsa letho le phoso, le hore o tla boloka Lentswe ka leng leo A le buileng. Empa sera sa nyenyelepa ho kena; jwaloka thellanyane eo e mafura e ka ntshang moradi wa hao ya ntoo itshwara hampe; kapa—kapa mosadi wa horeng a nke, a tswe le mora hao, ka ho tshwana. Lea bona, a nyenyelepa ka hare. Sera sa Modimo sa nyenyelepela ka hare le ho hhalosetsa Eva Lentswe ka phoso.

<sup>60</sup> Jwale, yena, ka tlolo ena, se nkile taolo mme se hapile tshimo ya Edene, ka boyena. A inkela yona. Mme jwale o qetile dilemo tse dikete tse tsheletseng tsa puso ya thetso; a ntse a thetsa batho, bana ba Modimo, jwalokaha a entse mohlang oo. Hobane, ba ne ba beilwe bolokolohing ba kgetho, ho itshwara kamoo ba neng ba lakatsa kateng. Mme ka ho dumela hore ba tla itshwara hantle, kapa ho tshepa hore ba tla itshwara hantle, mohlang oo ba tla ka ketso e phoso, mme ba rekisa ditokelo tsa tswalo ya bona, jwalokaha Esau a entse, bakeng sa lefatshe. Mme Satane a le hapa, mme a nka taolo ya lona. Mme o fumane dilemo tse dikete tse tsheletseng a haha Edene ya hae, jwalokaha Modimo a fumane dilemo tse dikete tse tsheletseng ho phethela Edene ya Hae. Mme ka thetso, thetso ya Lentswe, kapa ya batho, jwale o theile Edene ya hae lefatsheng lena, ka sebe.

<sup>61</sup> Edene ya Modimo e ne e theilwe ka ho loka. Edene ya Satane e theilwe ka sebe, hobane Satane ke sebe. Modimo ke ho loka, mme mmuso wa Modimo o no theilwe ka ho loka, le kgotso, le Bophelo. Mme motheo wa Satane o sebeng, homme, sebe sa borapedi.

<sup>62</sup> Lemohang kamoo a thetsitseng, thetso ya hae, jwalokaha a ipoletse a tla etsa. O tshepisitse ho etsa sena. Motho o teng ya

tsebileng seo? A re phetleng ho Isaia, ha le batla a mang a Mangolo ana. Ha le...ke tshwanetse ho qotsa a mangata a wona, kea kgolwa. A re phetleng ho Isaia kgaolo ya 14, motsotso feela, mme re bone feela seo Satane a se buileng mona, motsotso feela. Ho Isaia 14, re tla e bala, le ho sheba seo thaka lena le se entseng. Isaia 14, ho qala ka temana ya 12.

*O wele jwang lehodimong, Mphatlalatsane, mora mafube!o rapalanditswe jwang fatshe, wena mohlasela ditjhaba!*

*O ne o re pelong ya hao, ke tla hlwella lehodimong, ke bee terone ya ka kahodima dinaledi (bao ke bara), dinaledi tsa Modimo: ke dule thabeng ya phutheho, . . . lehlakoreng la leboya:*

Mme ke tla phahama hodima maru; mme ke tshwane le Mookamedi ya phahameng.

<sup>63</sup> Jwale bapisang hoo mona le Mangolo a mang kwana ho Bathesalonika, nakwana e fetileng, ka moo a itseng, "O dutse ka tempeleng ya Modimo, a iphamisa hodima hohle ho bitswang Modimo, hore jwaloka Modimo a tle a kgumamelwe e le Modimo hodima lefatshe."

<sup>64</sup> Ke eo modimo wa lefatshe lena eo ke le reretseng ka yena Sontaha se fetileng. Ke enwa kajeno ka thetso, hora e mano eo, nako eo ya tonana eo re phelang ho yona. Ke nako e kganyang ho feta mengwaheng yohle, hoba re boetse re lebahane le Dilemo tse kgolo tse Sekete; re boetse re tobane le Edene. Empa hantle mongwaheng ona, thetso yohle le lewa ka leng leo a le sebedisitseng mme a kgona ho thetsa ka lona, o di phuthile mmoho kaofela mme a inatlaftsa; le ho theoha jwaloka Modimo, mme o ipeile madulong a Modimo; borapedi, mme a ka qotsa Lengolo mme a ka o bolella Lengolo, hantle jwalokaha Satane a entse ho Eva tshimong ya Edene. Haese ho siya lethebana le le leng ho Lona, ke pheto seo a lokelang ho se etsa, ho etsa sekgeo seo, moo thuto e tjhefo ya diabolose e ka phoroselang le teng, jwaloka Sefe ya monna ya kelello eo re buileng ka yona bosiu bo bong.

<sup>65</sup> Jwale, o itse o tla iphamisetsa hodima Mookamedi ya phahameng; o tla hlwella hodima maru le dinaledi, mme o tla dula mono jwaloka Modimo, mme a be kahodima Mookamedi ya phahameng. Mme o atlehile ho phetha ditshoso tsa hae. Ruri o bile le katleho e babatsehang ho phetha ditshoso tsa hae, kaha batho ba mo lesa ho e hhalosetsa hole, mongwaheng ka mong, theko ya Lentswe la Modimo le baletsweng mongwaha oo. Ke kamoo a e entseng hantle. Mongwaheng o mong le o mong, a Le hhalosa ho le isa hole.

<sup>66</sup> Mehengleng ya Noe, o hhalositse e le ntho e ke keng ya etsahala hore pula e tsholohe lehodimong, hoba, "ha ho pula hodimo mane." Evangelia ya hae e kgolo ya saense eo a e rerileng

tshimong ya Edene! A ka kgona ho thunyetsa dibetsa kgweding le ho paka ho se mongobo hodimo mane. Empa Modimo o itse pula e tla fihla. Empa Satane a atleha, mme a kenya tjhefo kelellong tsa batho, ka dipatlisiso tsa mahlale, hore, “e ke ke ya etswa.” Empa e entswe. Modimo o itse e tla etswa, mme ya etswa. O entse.

<sup>67</sup> Jwale, mehleng ya—ya Jesu, o entse ntho e tshwanang. A boela a senya dikelello tsa bona ka tjhefo ka thetso, lea bona, ho hlalosa Lentswe hampe. “Ha O le Mora Modimo, jwale nke ke O bone o etsa ho hong ka yona.”

<sup>68</sup> Jesu ha a ka a swaswa le yena. Lekgale bo. Modimo ha se seswaswi. Ha a hloke ho araba letho leo Satane a le botsang. Feel a ba le... Jesu a re, “Ho ngodilwe, ‘O ke ke wa phela... Motho a ke ke a phela ka bohobe feela, empa ka Lentswe le leng le le leng le tswang molomong wa Modimo.’” Lea bona, O ne a sa hloke ho swaswa, ka baka la hae. O ne a sa hloke ho etsa bohobe. A kabe a bo entse, empa O ne a tlabe a mametse diabolose, ka hona O ne a sa hloke ho mamela diabolose.

<sup>69</sup> Mme hape ke sebe sa borapedi, jwaloka tshimolohong, se thetsa haholo. E shebeng jwale. Ha se sebe sa kamehla sa kgale feela se paala, ho feba le ho tawa, le ho tlaela ka Lebitso la Modimo. Ha se yona. Tjhe.

<sup>70</sup> Le hopola dilemo tse fetileng, bongata ba lona mona, mekaubere, le hopola thero eo ke e rerileng, ka, *Maswabi A Kahlolo*. Sehlola, ha se ka ke sa swaba mono. Se tseba moo se yang teng. Letahwa le ke ke la swaba mono. Seritedi sa jwala, semokolaro, lehata, leshodu, le ke ke la swaba. Empa, monna eo ya nahanang hore o lokile, ke ao maswabi.

<sup>71</sup> Ke thaka leo, ho re, le ho re, “Morena, na ha ke a rera Evangeli, na ha ke a leleka matemonia, ka Lebitso la Hao?”

<sup>72</sup> Jesu o itse, “Tlohang ho lona... ho Nna, lona ba sebetsang bokgopo. Ha Kea ka ka le tseba le ka mohla.” Ke ao maswabi, lea bona, thetso eo.

<sup>73</sup> Ke sona seo kgafetsa ke... moo ke utlwisiswang ka phoso haholo. Hase hore ke batla ho fapania. Ha ke batle ho fapania, empa ke loketse ho tshepahala. Ke na le Molaetsa, mme Hoo tlamehile ho ya bathong. E etsa hore o utlwisiswe ka phoso haholo hara batho. Ba nahana hore ke kgahlano le motho e mong le e mong. Hola ba tseba, ke emetse motho e mong le e mong, le ho leka ka bokgoni ba ka ho ba tlisetsa se e leng Nnete, jwalokaha e beilwe pelong ya ka le kamoo e beilweng ka hara Bibele mona. Mme Modimo o e paka e le Nnete, ka baka leo ha ho letho le ka etswang ka yona. Kahoo, e leng hore ba E sheba, kapa ha ba etse.

<sup>74</sup> Lea bona, ha ba batle ho E bona, hobane ba se ba ithekisitse, ba rekisitse ditokelo tsa bona tsa tswalo

mokgatlong o itseng, phuthehong e itseng ya borapedi; ho leka ditokelo tsa bona tsa tswalo, ho kena Lehodimong ka motheo wa borapedi bo itseng bo hlophilweng, boo Satane e leng hloho ya qhetswana ka leng la bona. Modimo ha o eso be le borapedi bo hlophilweng le ka mohla, lekgale ha eso etsahale. Mme ba ithekisetsa yona, moo bona, sehlopha sa banna, se hhalosang Lentswe mme ba re Le bolela *sena* mme Le bolela *sane*.

<sup>75</sup> Modimo ha o hloke toloko. O Itolokela ka boWona. Ha A hloke motho o sele ho Mmolella kamoo e etswang. Boholo ba Hae bo ikemetse. O boletse kamoo A tla e etsa, mme O tshwanetse ho boloka Lentswe la Hae jwalo. Ha A itse, "Mehlolo ena e tla tsamaya le ba dumelang," O ne a bolela seo hantle. Sohle seo A boletseng se tla etsahala, A se boletseng se tla etsahala mehleng ena ya qetelo, hore O tla etsa dintho tse itseng, mme O di entse. Ha A lokela ho botsa motho ofe feela hore ke nako kapa tjhe. O a tseba hore ke nako efe, le hore leano ke lefe.

<sup>76</sup> Jwale, Satane, mothetsi enwa, jwalokaha ho boletswe ho Mattheu 24:24, ka thetso e kanana. Jwale, re fumana hore ka mananeo a hae a evangedi ya tsebo, thuto e ntlenyana, boitshwaro bo phahameng, tswelopele, le tse jwalo, o rebile batho ba batlang ho sebeletsa Modimo, ho dumela leshano la hae.

<sup>77</sup> Eva o na a sa batle ho etsa ntho eo, empa a mmontsha kamoo bohlale bo bongata bo no bo le teng ho yona. Mosadi o ne a sa tsebe; o ne a batla ho tseba. A sa utlwisise, empa a batla ho utlwisia. Mme Modimo o mmoleletse ho se leke ho utlwisia.

<sup>78</sup> Nka utlwisia jwang e nngwe ya dintho tsena? Nke ke ka di utlwisia. Ke a di dumela. Ha kea tlameha ho di utlwisia. Modimo ke tumelo, mme e seng kutlwisiso. Re dumela seo A se buileng.

<sup>79</sup> Jwale, ako bapiseng Edene ya Modimo le ya Satane jwale, ka mora dilemo tse dikete tse tsheletseng tsa kgopamiso ya tlhaloso ya nneta ya Lentswe la Modimo la pallo ho mongwaha. Jwale ha re e bapiseng, mme re bone moo re fihang teng. Jwalokaha a entse ho kerekere e-e mehleng ya Kreste, ho Jesu, ho leka ho—ho thibela bara ba tshepehang ba Modimo ho tseba Nnete. Bao ke ba Modimo. Modimo o beile bara ba Wona mona, mehopolo ya Hae, ho qoqa le Yena ka ho utlwa Lentswe la Hae.

<sup>80</sup> Ha ntatao a ka o laya, mme o le mora ya tshepehang wa ntat'ao, mme a o laye, "Mora, o se ke wa kena metsing ao mono, ho sesa, hoba ho na le dikwena metsing ao"; mme ho ntoo fihla thaka le leng, ho re, "Ruri, metsi a matle hakaale, ha a na dikwena"? Jwale o tla mamela mang? Ha o le mora wa sebele, o tla mamela ntat'ao.

<sup>81</sup> Mme mora kapa moradi wa sebele wa Modimo o nka Lentswe la Modimo pele. Ha ke tsotelle seo motho a se bua ka lona, ba nka Lentswe la Modimo pele. “Lefu le teng ka nkong eo,” mme ba e dumela.

<sup>82</sup> Ho ba le tumelo Lentsweng la Hae lohle, Dipeo tsa Hae, ho hlahisitse Edene ya kgalaalelo, lerato, le Bophelo bo sa Feleng. Ke seo Edene ya Modimo e se hlahisitseng, kgalaalelo. Mme e hlahisitse Edene ya kgalaalelo, ya lerato, kutlwisiso, phetheho, le Bophelo bo sa Feleng. Ke seo Modimo a ntseng a se jala, Lentswe la Hae, Peo ya Hae. Ke seo Kereke ya Hae e tl Lang ho ba sona qetellong; E tla ba ntho e tshwanang.

<sup>83</sup> Lemohang, mohopolo ke ona. Le se ke la o lebala. Ke sa tla kgutlela ho wona ka le leng kapa Molaetseng o mong. Empa, lea tseba, Modimo o itse, “Peo e nngwe le e nngwe e hlahise se sa yona.” Na ke molao wa Modimo oo? Jwale moreri e mong, kapa motho e mong o thusang, ha a leka ho buisa Lentswe leo ntho e sele? Le a bona, Lentswe le leng le le leng la Modimo ke Peo. Jesu o itsalo, “Peo eo mojadi a e jetseng.” Ka baka leo efela ha Mareka 16 e le Lentswe la Modimo, e tla hlahisa se sa yona. Ha Malaki 4 e le Lentswe la Modimo, e tla hlahisa se sa yona. Le tshepiso efe feela e tshwanela ho hlahisa se sa yona.

<sup>84</sup> Le a bona, ana le bona boikgakanyo ba Satane ka ntle mona? O leka ho re, “Hase yona, ha ho jwalo.” Lea e utlwisia? [Phutheho, “Amen.”—Mong.] Le a bona, Satane o re, “Oh, Hoo ha ho a etsetswa tsatsi lena. Hoo, hoo—hoo ke . . . E ne e le nako e nngwe. Hoo, ebile ha ho bolele jwalo.”

<sup>85</sup> “Peo ka nngwe e tshwanela ho hlahisa se sa yona.” Modimo o theile Edene ya Hae jwalo. Na ho jwalo? [Phutheho e re, “Amen.”—Mong.] Mme ke ena moo e leng teng, ke kamoo Modimo a theang Kereke ya Hae, Lentswe ka leng ka mofuta wa Lona! “Motho a ke ke a phela ke bohobe feela, empa ka Lentswe le leng le le leng le tswang molomong wa Modimo.” Le a bona? Satane, o tla nka ntho e nngwe. Empa Modimo o itse, “Peo e nngwe le e nngwe ka mofuta wa yona.”

<sup>86</sup> Ha tshepiso e itse, “Mehlolo e tla tsamaya le ba dumelang ke yona ena.”

<sup>87</sup> Jwale kereke e re, “Ngodisa kerekeng. Thothokisa tumelwana. Ithute katekisima.” Ntho e jwalo ha e fumanwe Bibeleng yohle.

<sup>88</sup> Empa Jesu o itse, “Mehlolo e tla tsamaya le ba dumelang ke yona ena: ka Lebitso la Ka ba tla leleka batemona; ba tla bua dipuo tse ntjha; ha ba tshwara dinoha, kapa ba nwa dintho tse tjhefu, di ke ke tsa ba bolaya; ha ba Bea matsoho hodima ba kulang, ba tla fola.” Motho ke mang ho hanela Taba eo? Lea bona?

<sup>89</sup> “Peo e nngwe le e nngwe e tla hlahisa se sa yona.” Ha o le peo ya Modimo, mohopolo, mora wa Modimo, ke moo Lentswe la Modimo le jetsweng ka ho wena. O a bona? Mme ha o utlwa Lentswe la Modimo, “Dinku tsa Ka di utlwa Lentswe la Ka; o sele di ke ke tsa mo latela.” Lea e tshwara? “Eba ke moo peo e nngwe le e nngwe e beang se sa yona.”

<sup>90</sup> Jwale re fumana, hobane peo ka nngwe e bea se sa yona, lefu le ne le le siyo nthong e ntjha . . . ka hara Edene eo. Lefu ha le sa tla ba teng ka hara Edene e ntjha. Le a bona, ho ne ho se letho, le letho haese kgalalelo, hwelko, le Bophelo bo sa Feleng.

<sup>91</sup> Jwale, ka ho se dumele Lentswe la Modimo, ho hlahisitswe peo e sa halaleleng ka hara Edene ya Satane. Jwale re kena moo Satane a hlwellang terone, jwaloka antikreste, e—e Edeneng ya lefatshe lena, Edene ya sebe, borapedi bo kgopameng. Ha a ka a qala ka, “Nna ke Satane. Ke lengeloi le leholo.” Tjhe, e seng ka hono, empa ka ho kgopamisa Lentswe la Modimo. Mme o hlomile mmuso wa hae jwalo, mongwaheng o mong le o mong. Mme jwale mongwaheng o moholo ona wa thetso, o itokisetsha ho hlwella terone ya hae, ka batho ba hae! O ikahetse Edene ya hlalefo, ya thuto, ya saense; ka nepo, bareri ba saense, kereke ya saense, thutamodimo ya saene, ntho e nngwe le e nngwe ke ya saense. Ntho e nngwe le e nngwe e theilwe hodima tsebo. Kereke yohle e hahilwe hodima tsebo. Ha ea hahwa hodima tumelo.

<sup>92</sup> Nkile ka kena kerekeng ya monna e mong ho tshwara tshebeletso. E le oditoriamo e kgolo bophirima. Monna ya lokileng, mme o ne a hana dintho tsena tseo re buang ka tsona. Empa leha ho le jwalo, o ne a . . . Ka mo rata; monna ya lokileng, monna ya hodileng. Eitse ha phutheho ya hae e tswa . . . E ne e dudisa batho ba ka etsang dikete tse tsheletseng. Eitse ha phutheho ya hae e tswa, tshebeletsong ya thapama, e ka ba sekete le makgolo a mahlano, bohole ba apere hantle ba rutehile. Ka dula mono ka ba shebella.

<sup>93</sup> A rera therou e monate, ehlie monna eo. Mme yaba o kopa motho ya batlang ho amohela Kreste; ho phahamisa matsoho a bona feela. Mme ha ho motho ya ileng a phahamisa matsoho a bona. Mme qetellong mosadi a phahamisa matsoho a hae. A re, “Ho lokile, jwale o Mokreste,” mme a mo hlaphisetsa kolobetso. Mme eitse ha a tswa . . . A hlohonolofatsa lesea, a aka lesea a le rapella, mme a qhalanya letshwele ho ikela.

<sup>94</sup> Eitse ha phutheho ya hae e tswa; batho ba batle, ba baithuti, ba rutehileng. Ke ne ke eme ka thoko, ho tsukutla letsoho la monna eo le ho mo lakaletsa mahlohonolo a Modimo, ha a tswa.

<sup>95</sup> Mme ha ke etsa jwalo, letshwele la ka ke lena le kena. Ba ke ke ba le dumella ho kena letshwele la hae le sa le mono. La ka ke lena le tla, ka ditulo tsa bakudi, mapara, ba tlamilwe, ba

hlanyang, le ntho e nngwe le e nngwe e sele. Le bona phapang? Ke yona. Ke yona ntho eo ke buang ka yona, le a bona. Le a bona, ke ntho e fapaneng.

<sup>96</sup> Etswe, ka tsebo ya saense o ka bea Evangedi ya *kutwisiso*, hore, wena, “ya dumelang ho Jesu Kreste a ke ke a tsuwa,” le a bona.

<sup>97</sup> Empa, “Mehlolo e tla tsamaya le ba dumelang ke yona ena,” le a bona, o sitwa ho kenya Hoo mono, le a bona. Mosadi o dumetse ho Jesu Kreste, o bolokehile, ha mehlolo ena e fela e tsamaya le modumedi.

<sup>98</sup> “Mme ya utlwang Lentswe la Ka,” e seng ho iketsisa feela, e seng ho Le utlwka ditsebe tsa hae, empa, “ho Le utlwisia.” Mang le mang a ka Le utlwka; seotswa se ka Le utlwka sa dula e le seotswa; le a bona, letawa le ka Le utlwka; lehata le ka Le utlwka la sala e le lehata. Empa “Ya utlwisisang Lentswe la Ka, mme a dumela ho Ya Nthomileng, o na le Bophelo ba kamehla.” Ke moo he, o a bona.

<sup>99</sup> Mme ha ho motho ya ka etsang hono Modimo a sa mo rera pele. Jesu o itse, “Ha ho ya ka tl Lang ho Nna, a sa hulwa ke Ntate wa Ka, mme bohole bao Ntate a Nneileng bona ba tla tla ho Nna.” Amen. Tsohle ke boikemelo le boitsebelo-pele ba Modimo. O Iphelela a nnotshi mme ha ho ya ka Mo eletsang hore a etse eng.

<sup>100</sup> Jwale, ka ho se dumele, ka ho sitwa ho nka Lentswe lohle la Modimo, ho hlahisitswe peo ya ho dumele, e sa halaleleng, ya sebe, lehloyo, lefu le sa Feleng mongwaheng ona wa kereke o tletseng sebe, wa hlalefo. Jwale na le e tshwere? Tsatsing lena, mohla lefatshe lohle le tletseng borapedi! Ana le tsebile taba eo? Lefatshe lohle le tletseng borapedi. Mme mongwaheng ona wa borapedi, dikereke tse kgolo koung ka nngwe; ntho e nngwe le e nngwe, ntho yohle e fihlela sehlohlolo ka ho kgumamela Satane. Ke ena mona, hantle mona ka hara Bibele. Ke hantle. Mme dikoleshe tsena tsa hlalefo, tsa thutamodimo di qhotsitse motho ya bohlale ya rupeletsweng ho bua, hore a etseng, bokgoni ba ho fehla maikutlo a bona; le ntho tsohle tse kang saekholoji, dilemo tse tharo le tse nne, ho tseba mokgwa wa ho sebetsana le kelello ya motho. Le a bona, ke . . .

<sup>101</sup> Moya wa Modimo hase ntho eo, eo wena, o e hlohlwang ka thuto. Ke ntho e rerilweng-pele ho kena ka ho wena, ka letsoho la Modimo o Matlawohle. O ke ke wa rutwa boiphihlelo ba hao kapa wa bo rupellwa. Bo rerilwe-pele, ke letsoho la Modimo le boitsebelo ba Modimo, ka ho wena. Ke hantle.

<sup>102</sup> Jwale, ho hlahisitse Edene-hadi ena eo re phelang ho yona jwale, Edene ya lefatshe la bokereke. Hajwale ba kopana mmoho Lekgotleng le lehlo la Bokereke, mme ba tla thea kereke ya lefatshenthoh yohle e tla ipea tlas'a hloho e le nngwe, e leng moo Satane a tla hlwelliswa teroneng, hantle ka nepo.

<sup>103</sup> Mme mokgosi wa ho qetela o a tswa, ho qhautsa Monyaduwa pele A kena mono. Hoba hang ka hare ka mono, o se a amohetse letshwao la sebata, mme ho fedile ka yena, a ke ke a hlola a tswa ho lona. Ke ka baka leo, ho thweng, “Tswang hara bona, Setjhaba sa Ka,” pele e kena ho yena, le a bona. “Tswang hara bona, mme le ikgethe.”

<sup>104</sup> Jwale, lehloyo le lefu, le karohano e sa Feleng hole le Modimo, Edeneng ena; takatso, ditshila, kgopamiso, (jwang?) ka ho jala peo e phoso.

<sup>105</sup> Hoo ho nkogopotsa pono eo nkileng ka e bona le pele ke kopana le batho ba Pholoso, ya Monna eo ya potolohang lefatshe, a apere bosweu. Le nkutlwile ke e pheta hangata. Mme e mong a Mo sala morao, a jala peo ya kgohlano.

<sup>106</sup> Empa o e hlotse ho iphotlileng, ho Eva...tshimong ya Edene, ka takatso ya Eva ya sebe; takatso ho Eva, ya sebe. Jwale, efela ha Eva a lakadirse tsebo, e ne e le sebe.

<sup>107</sup> Mme ha re lakatsa tsebo, ho batla Ph.D., LL.D., ke sebe ho etsa jwalo. Ke mantswe a thata ao, empa ke Nnene. Ho sa tsottelehe a thata hakakang, e sa ntse e le Nnene, le a bona. Ho lakatsa tsebo, kutlwisiso!

<sup>108</sup> Taba ke hore, ke hore, kajeno ha re leke ho thea Lentswe la Modimo dipelong tsa batho. Re leka ho ikaha. Dikereke di leka ho thea thuto ya kereke, pelong ya motho.

<sup>109</sup> Re omelwa ho thea Lentswe la Modimo. Pauluse o itse, “Ha kea ka ka tla ho lona ka mantswe a hohelang a motho, hore tumelo ya lona e thewe tsebong ya motho; empa ke tlie ho lona ka matla; ka diponahatso tsa Moya o Halalelang, tumelo ya lona e tle e thewe ho Modimo.” Ke moo he.

<sup>110</sup> Motho ha a tshwanela ho ikaha. Re fumana hoo hara...Ere Modimo a etsitse motho ntho mme a mo rome, o fumana motho mang le mang a leka ho e etsisa. Le a bona, ba leka ho ikaha. Motho e mong le e mong, “Ke entse hona. Nna, ke, ya ka, phutheho ya ka, nna, hona,” ho ikaha bobona. Re rera ka’ng, ka rona kapa ka Mmuso wa Modimo?

<sup>111</sup> Theang Lentswe la Modimo. Ntshang ho se dumele mme le thee Mmuso wa Modimo pelong ya motho. Mme Mmuso wa Modimo o ke ke wa theoa pelong ya motho ha Modimo a sa bopa motho eo jwalo. A ke ke a theoa ka hara...

<sup>112</sup> Mme, le hopole, karolo e thetsang, moo motho a nahananang hore o lokile. “Ho motho tsela e ka bonahala e lokile.” Motho e mong le e mong ya rutehileng ekare o lokile.

<sup>113</sup> Jwalokaha ke le boleletse diSontaha tse mmalwa tse fetileng; mohla ke ne ke eme pela lesea la ka le shwang, mme Satane a eme mono a re, “Ntat’ao ke eo, o shwetse matsohong a hao bosiu bo bong. Mosadi wa hao ke eo o robetse mono e—e moshareng, mme lesea la hao ke lena lea ikela. Mme o Mo

kopile ho o araba, mme O hutse ntho ya hao...O o kgurumeditse ka kgaretene. Jwale, leha ho le jwalo Ke Modimo o lokileng, le jwalo u itse Ke Mofodisi. Mme wena, ya emetseng se o se boletseng se lokile, o fositse." Oh, lebaka le leng le le leng, setho ka seng sa kelello keha se dumellana le hore hoo ho nepahetse; mme o na a nepile, ha kalo.

<sup>114</sup> Ka mokgwa o tshwanang o na a nepile mohla a bolellang Eva, "Mahlo a lona a tla tutuboloha, mme le tla tseba botle le bobe. Mme le tla ba jwaloka medimo, ka mokgwa oo, ho tseba botle le bobe," ka hobane Modimo a na e-so ba dumelle ho itemoha le jwale, hore ba ne ba le feela. Kahoo ba tsebile ba tla tseba botle le bobe; mme o na a nepile. Empa, le a bona, e ne e le kgahlano le Lentswe la Modimo.

<sup>115</sup> Mme le baruti ba e etsa diseminareng, ba ithuta thutamodimo e entsweng ke batho; e ka re e lokile, e ka ba kutlwisiso e ntle ya ntho eo, empa e fosahetse.

<sup>116</sup> Ha re hloke ho Le utlwisia. Re Le dumela kahobane Modimo a itse Le jwalo, mme ho dutse ho le jwalo ka mehla le mehla. Ntho yohle, ke wona mokgwa wa ho Le dumela.

<sup>117</sup> Oh, kamoo Eva a na a lakaditse ho fumana Ph.D., kateng, le a bona, kamoo a na a lakaditse ho fumana bohlale ho feta—feta see a na a le sona!

<sup>118</sup> Lemohang kamoo ba tshwanang kateng, monna le mosadi wa hae...Jwale le lemohe, monna le mosadi, bobedi ba le feela tshimong ya Edene, Edene ya Modimo.

<sup>119</sup> Jwale ke tla kwala. Ke itse ke tla le tshwarella metsotso e mmalwa feela. Shebang, elang hloko jwale, ha re kwala.

<sup>120</sup> Bapisang taba ena jwale, monna eo le mosadi wa hae ba tshwana hakakang, ba babedi ka hara Edene ya Modimo, ba sa apara le sa-nketlana, homme ba sa ho tsebe. Hoba ke kahobaneng ba ne ba sa tsebe? Hoba ba ne ba sirilwe dithusakutlo tsa bofeela ba bona, ke Lesira le Halalelang, la Moya o Halalelang. Ba ne ba ka shebana hantle, mme ba sa tsebe hore ba feela. Ba ne ba kgurumeditstswe ke Moya o Halalelang, wa kgalalelo. Ba ne ba kgurumeditstswe.

<sup>121</sup> Lesira la Modimo, le kajeno, le ka sheba mme le sa lakatse. Ba sokolla hloho tsa bona. Ke Lesira le Halalelang, le a bona, Lesira le Halalelang. Modimo o ne a entse mahlo a bona...bobedi ba bona, e mong e le monna mme e mong e le mosadi, mme ba sa tsebe hore ba feela, hoba kgalalelo ya Modimo ya baballa mahlo a bona a kgurumeditstswe. Lemohang, Modimo wa pata taatso ya bona sebeng, ka Lesira le Halalelang.

<sup>122</sup> Hola re na le nako ya ho dik-a-dika mono, metsotso e mmalwa. Shebang mona, "Hobane yena, morapedi ya hlatswitweng," Baheberu, "morapedi ya hlatswitweng, ha a sa na takatso ya sebe." Sebe se tlohile ho yena.

<sup>123</sup> Ke utlwile Moena Neville a bua, hoseng hona; eka motho o mmotsitse hobaneng ke sa rere ka Moya o Halalelang, hobaneng ke sa etse *hona*. Ke ena moo e leng teng. Moya o Halalelang ke kgato e ka ho wena. Ke Bophelo, e seng maikutlo; e seng bopaki bo itseng ba nama. Empa Ke Motha, Jesu Kreste, Lentswe la Modimo le theiloeng pelong ya hao, ho phedisa Lentswe ka leng la mongwaha ona. Hantle. Hlokomela Moya o Halalelang kgatong, e seng hakaalo diponahatsong; empa, kgatong, seo O se etsang ho latela Lentswe.

<sup>124</sup> Lemohang Moya o Halalelang jwale, wa Lentswe le Halalelang la Modimo, o no o babaletse monna le mosadi ba le feela, mme ba sa tsebe. Ho hotle hakakang, Bophelo ba Lentswe; Peo, Lentswe!

<sup>125</sup> Modimo wa re, “Ho na le sefate se hara tshimo, mosadi. Mme hara tshimo ena ho na le sefate sena; le se ke la se ama. Hoba, mohla le se jang, le tla shwa mohlang oo.” Ba ne ba kgurumeditswa ka kgalalelo hole le sona, ba sa tsebe letho ka sona, ba sa tlameha ho se ama.

<sup>126</sup> Ba ne ba kgurumeditswa ka kgalalelo. Ba ne ba babaletswe kalaneng ya Modimo. Ba ne ba phela. Ho se lefu le ba dikileng. Alleluia! Ba ratana ka lerato le phethahetseng, Bophelo bo phethahetseng ka mehla. Ba na le lerato le phethahetseng, kutlwisiso e phethahetseng ya lerato la Modimo. Ba ena le Lentswe la Modimo, mme ba Le boloka. Mme ba ne ba phela mme ba bolokehile Edeneng ya Modimo, ho se lefu le ba teetseng hare ho hang.

<sup>127</sup> Yaba, Satane o mamedisa Eva evangedi ya hae ya thutamodimo, evangedi ya tsebo, thupello e phahameng, maitshwaro a kgabane a phahameng, tswelopele e ntle, thuto e phahameng, le tse jwalo; eitse hobane a mo emise ho mo mamela motsotso, mabaka a hae (athe re laelwa ho a qhela), eitse hobane a mo mamedise wona.

<sup>128</sup> “Jwale, shebang mona, kereke e *tjena-le-tjena*. E ne e theoe kgale ha kana. Re e nngwe ya dikereke tsa kgale naheng. Ramotse o kena teng.” Ha ke tsotelle see e leng sona, le a bona. Ha e le kgahlano le Lentswe la Modimo, ema kgahlano le yona. Ke sera sa hao. Ntho efe feela e kgahlano le Lentswe ke sera sa hao.

<sup>129</sup> Ntho efe feela e emelang Lentswe ke moena wa hao. Ke karolo ya hao.

<sup>130</sup> Lemohang, a phetla Lesira le Halalelang, ho bona seo motabo o no o le sona ruri; bapisa seo, seo takatso e ka hlang ya se etsa. A phetla Lesira mahlong a hae, ntho e halalelang eo Modimo a na e beile hodima mahlo a hae. A batla tsebo, ho tseba tsohle tse maloka le oona; ka hona a phetla Lesira ho bona sohle se maloka le wona. A mamela diabolosi, mme le lemohe maemo ao e mmeileng ho oona.

<sup>131</sup> Esale ba etsa jwalo mongwaheng o mong le o mong ka mora moo, ba kgetha lehlakore la bohlale ka mehla; mme jwale ho theilwe mmuso wa Satane, tsebo, peo ya hae a e jetseng, mme e hapile lefatshe ho le fetola Edene ya lefu.

<sup>132</sup> Jwale lemohang. Jwale shebang Ditshenolo 3, Mongwaha wa Kereke ya Laodisea. Le o nahane kelellong tsa lona.

<sup>133</sup> Jwale le lemohe. Yena, Eva, ke mofumahadi wa Satane. Le a bona, Satane, sebata, o fihlile ho Eva pele Adama a fihla ho yena. Le a bona? Ke hantle. Ka hona a mo silafatsa, le a bona; ka baka leo Satane, sebata, eibile monna wa Eva le pele Adama a tseba. Le a bona, a silafatsa mosadi. Bibele e mmoletse a entse jwalo, mme mosadi a tseba hobane o feela, ke hona. Le a bona?

<sup>134</sup> Jwale le shebe e—e Mongwaha wa Kereke ya Laodisea. Yena, Eva, o dutse jwaleka mofumahadi wa Satane. “O ruile dintho tsa lefatshe; o sefofu, o boetse o feela, mme ha a tsebe,” jwaloka ha ho etsahetse Edeneng ya Modimo. Empa jwale, e seng kahobane Lesira le Halalelang le dutse hodima sefahleho sa hae, empa lesira la takatso. Ke hore, o tlositse Lesira la Modimo le Halalelang, mme a kgwesa lesira la tsebo, bakeng sa takatso. Mme jwale o na le lesira la takatso, o “foufetse” hore ke sebe. O “feel” seterateng, “mme ha a tsebe.” Ke seotswa seterateng. Basadi bana ba aparang dishoto tsena, mahlong a Modimo, ke seotswa, “mme ha a tsebe.”

<sup>135</sup> Lemohang, nkang basadi ba rona. Jwale, ha le batla ho bona maemo ao kereke e leng ho oona, shebang kamoo basadi ba itshwereng kateng. O tshwantsha kereke ka mehla. Edeneng ya Satane, ya sebe le ho se dumele, kgopamiso ya borapedi; mmuso o kgopameng. Ho ena le ho nka Lentswe la Modimo, ba nkile thuto ya bohlale ba motho. Mme ho ena le ho nka Kereke, ba nkile mokgatlo, mme ba o isa hloohong e le nngwe e kgolo.

<sup>136</sup> Jwale lemohang, ho kgopamiswa ho tloha bohlweking. Le se fose taba ena jwale. Esale kereke e apere lesira lena la takatso. Hlokamelang hore le mo etseditseng. Le—le mo kgopamisitse ho tloha bohlweking ho ya tsebong. Le a bona? Lesira le Halalelang, o ne a hlwekile; ka lesira la takatso, yena ke tsebo. O a tseba hore e monate. O tseba see e se etsang, le a bona. Ke tholwana, ke sefate se lakatsehang, ho hlalefisa motho. Le a bona? O kgopamisitswe ho tloha bohlweking ho ya tsebong, ho tloha kgalalelong ho ya ditshileng le takatsong, le ho tloha Bophelong ho ya lefung.

<sup>137</sup> Mmuso ona o lokela ho timela. Mmuso ona o tla timela! Modimo wa Lehodimo o tla o fedisa hodima lefatshe.

<sup>138</sup> Lemohang, kgopamisong ena, e tlohile ho monna ho ya ho mosadi, le ho tloha ho mosadi ho ya ho monna, “mme ha ba tsebe.” Sebeoa se setle sa Edene ya Satane, ha o ka sheba diterata kajeno, batho ba rona ba sejwale-jwale.

<sup>139</sup> Lemohang, ke Eva ya sebedisitsweng ke Satane ho dihela Adama sebeng ka matla a hae a takatso. Jwale ho a tshwana, ho etswa ntho e tshwanang kajeno. Lemohang, moriri o ponngweng, sefahleho se takilweng, moaparo o tjhatjheisang, le a bona, o etsa jwalo, mme ha a tsebe hore ntho ka nngwe ho tseo e kgahlano le Lentswe la Modimo. Ho kuta moriri wa hae, ho mo fetola mosadi ya tlottlolotsweng, seotswa. Ho apara marikgwana, ho mo hlahisa e le mosadi ya hlabisang dihlong. Ho apara mese e tjhatjheisang, ho mo etsa seotswa. “Mme ha a tsebe,” e seng ka baka la kgalalelo ya Modimo; ka baka la takatso ya Satane. Mosadi o entse hore... O etsa hore Adama wa hae a mo lakatse.

<sup>140</sup> O hlobotse diaparo tseo Modimo a na a mo apesitse tsona, morao Edene, bakeng sa leeto la hae le haolang le—le lehwatata lena. O di hlobotse. A itlhobodisa ruri. Athe, Modimo o na a mo phuthetse ka matlalo; o se a qadile ho beola hanyane-ka-hanyane nako le nako, jwale o kgutletse morao moo a na le teng tshimolohong.

<sup>141</sup> Jwale o tentshitse Adama wa hae diaparo tsa hae tsa ka hare. Monna ya aparang marikgwana ao a kgale a sadifetseng, mme a tswela ka ntle mona, ha ke kgolwe ho ena le monna e mokaalo ho yena. Ke ausi e moholo ka ho fetisia eo ke mo tsebang. Le a bona? Lea bona, o entse hore Adama wa hae ya kgopameng a itsware jwaloka yena, le a bona, ho apara diaparo tsa hae tsa ka tlase. O bone seo a kgonneng ho se etsa morao kwana mohla a na a hlobola diaparo tsa hae kaofela ntle le tsa kahare. Ke dishoto tseo. Hobane, tseo ke diaparo tsa ka hare tsa mosadi, mme jwale ke mona Adama wa hae o a di apara. Etswe, ho latela Lentswe la Modimo la tshimoloho, “Ke manyala ho mosadi ho apara seaparo sa monna, le ho monna ho apara seaparo sa mosadi,” ho tswa Lentsweng la tshimoloho. E nahaneng!

<sup>142</sup> Jwale, o bile o rwala mangetse a hae, hape. O a lepeletsa fatshe ka kama, mme a o sothe ka rolara. Tse ding tsa dintho tse nyonyehang tseo nkileng ka di bona bophelong ba ka, ke bashanyana ba ka ntle bana mona kajeno ba lepeleditseng meriri *tjena*, mme o kentswe mmala, moriri o sweufaditsweng, ka khemikale ya mofuta, le ho sweufatsa meriri ya bona, le ho e thatela ka rolara, ho etsa mangetse. Ausihadi tote! Ke ntho e nyarosang ho e bua sefaleng, empa kahlolo e qala tlung ya Modimo. Ha o bile ha o tsebe hore o monna kapa o mosadi. Mme ke utlwile hore Lebotho la rona la United States le tlilo tswa ka dishoto kgetlo le latelang. Ke hantle. Le bona seo kgopamiso e leng sona? Ke diaparo tsa mosadi; ho rwala mangetse a hae.

<sup>143</sup> Tsatsi le leng, ha ke etetse kwana Howard Johnson; e seng enwa mona, empa e hodimo kwana tseleng ha o tswa. Mme ka dula feels ke hloletswe. Moshahanyana ke enwa a

sla, a butse molomo wa hae. Mme a na le moriri o lerootho *mona*, mme o sothehetse ka *mona*; le ho o kenya rolara, mme a o sothile, hodima mahlo a hae; a shebile ka bokahodimo ba mahlo a hae, ho potoloha jwalo. Ha eba nkile ka bona kgopamiso le ka mohla! Le a bona, a ke ke a e dumela. Mohlomong a ka ipaka a le motona, empa moyeng wa hae o motshehadi. Ha a tsebe o wela lehlakoreng lefe la ntlo. Ke hantle. Ha se le kgopamiso!

<sup>144</sup> Ke sona seo Satane a se etsang. O kgopamisa ditjhaba. O kgopamisa kereke. O kgopamisa batho. Ke mothetsi, ke mokgopamisi wa Nnete ya mantlha.

<sup>145</sup> Modimo o entse monna e le monna. O entse mosadi e le mosadi. Mme Wa ba apesa ka ho fapana, mme O lebeletse hore ba dule ba le jwalo le ho itshwara jwalo; e mong o motshehadi, mme e mong o motona. O arotse Adama tshimong ya Edene, mme a etsa hona, a arola Eva ho yena.

<sup>146</sup> Jwale o rwala mangetse a mosadi; yena o kuta moriri wa hae jwaloka wa monna, mme monna o leka ho bopa moriri wa hae jwaleka wa mosadi. Le a bona? Mosadi o apara diaparo tsa hae tsa ka ntle, mme monna o apara diaparo tsa hae tsa ka hare. Jwale, hoo eka ho nyedisa, empa ha ke e bolele jwalo. Ke Nnete ya Evangedi. Ha o sa e tsebe, e tla ba phoso e teng ka wena; mohlomong o foufetse kapa ha o eso kene diterateng. Mme mosadi o a nahana le monna o a nahana hore ho itoketse, ba tswelapele kae-kae.

Basadi ba re, “Be, ho tjhesa hakakang!”

<sup>147</sup> MaIndia a kgale a maApache ka ntle mono a ka o hlabisa dihlong. Ha ba ntse ba futhumala, ba arapa ho feta, ho itshireletsa letsatsing; oh, ho a fufuletsa, ba tle ba phodiswe ke moyo ha ba ntse ba tsamaya. Lea bona? Ba ema hantle letsatsing.

<sup>148</sup> Le ne le sa tlo kgona ho hang; le ne le ka tjha la tswa matjhatjhetsi. Empa, lea bona, ke seo le se bitsang thuto e phahameng. Ke mahlale a mehla ena a hlahisitseng hona. Oh, banna! Ke eo, “feel,” Laodisea, “mme ha a e tsebe.”

<sup>149</sup> Mosadi o ne a le feela Edene. Na le bona mebuso e mmedi e tshwanang? O mong ke wa sebe le lefu; o mong ke Bophelo le ho loka. Mono o ne a kgurumeditstswe ke Lesira le Halalelang. Ba babedi ba ne ba le feela; ba ne ba sa tsebe. Ba sa tsebe letho ka yona, hobane ba ne ba kgurumeditstswe ke Moya wa Modimo.

<sup>150</sup> Mme mona ba kgurumeditstswe ke takatso, mme ba shebana ho... Le a bona, Adama o na ka sheba Eva, mme a sa tsebe hore o feela. Empa jwale ka lesira lena la takatso, ha a elellwe hore o feela, empa o e etsa tlasa lesira lena la takatso ho shebisa monna ho yena. Ke lona feela lebaka leo a ka e

etsetsang lona. Ha o dumele seo, empa o a e etsa leha ho le jwalo, mme monna o a sheba. Mme monna o o fumana o hohela haholo, a ba a khutla a ikaparela tse ding tsa diaparo tsa hao ka boyena.

<sup>151</sup> Oh, ha se le kgopamiso! Mongwaha o mokakang! Ke nako e kakang eo re... E thetsa hakakang! Oh, dintho tsena tsohle, "mme ha a e tsebe," moyo o kgopameng ka ho phethahala o ka hara monna. O kgurumeditstswe ke takatso ya Satane, le mosadi jwalo feela, le yena. Ke moyo wa bosatane wa sosaiti se seholo. Le a bona, ha ba tsebe, empa ke mokgatlo. Basadi ba apereng dishoto, ke ditho tsa mokgatlo. Banna ba apereng jwalo, ba kene mokgatlong. Ke tla le fa kgutsufatso ya oona, B.S.S., Big Sister Society, ke maloko a ntho eo he. Tswang mono, mokgatlo wa boausi ba baholo, ka marikgwana ao a kgale, ka dintho tsa kgale tse kang dikotonyana, ntho ya kgale e shebehang e le ditshila. Ke—ke...

<sup>152</sup> Monna, o ka hanana le nna ka sena, empa ke Nnete. O kgopamisitswe mme ha o tsebe. Ha o sa hlola, ha o sa hlola o itshwere jwaloka monna. Le a bona, le kgutla le le bonolo; mme, mora wa bona, e ke ke ya hlola eba letho ho bona; monna, le basadi, le bona. Ke mokgatlo. Ke lemulwana le hlophilweng. Hobaneng? "John, moahisane, o apere dishoto, hobaneng nke ke ka kgona? Luella o batla ke a apere hobane Johanne o a apere, moahisane. Mme, che, ha—ha Susie Jane a kgona ho a apara, le Martha Jane a ka a apara, kapa Susie Lou," kapa lebitso la hae e ka ba mang, le a bona. Le a bona, ke mokgatlo. Ke lemulwana. U setho sa lona ka moyo, mme ha u tsebe.

<sup>153</sup> Mme ha eba ho le jwalo, mme rea bona ho jwalo, u foufetse ke hona. U foufetse mekgatlong ena eo Satane a u sothetseng ka hara yona. Mme ke kgopamiso ya Lentswe la Modimo la mantlha, le Mmuso wa Hae, le leano la Hae la bana ba Hae. Satane o sothetse banna le basadi ka hara dintho tsena, mme ha ba tsebe. Kgopamiso!

<sup>154</sup> Ha e sa le mora Modimo! Mangetse a lepeletseng sefahlehang sa hae, le para ya dishoto, o hoshola seterateng; mora Modimo, motikone kerekeng, moruti sefaleng? Tjhe, hase mora Modimo. Ha a tswa Sefeng ya mohopolo wa Modimo. O na sa tlo apara diaparo tseo tsa basadi; ruri o na ke ke; le mosadi o na sa tlo apara diaparo tseo tsa banna. Le a bona, hase mora Modimo. Ke mora Satane, le moradi wa Satane. Ke ntho e thata ho e bua!

<sup>155</sup> Satane o atlehile ho kgopamisa le ho hapa lefatshe lena, le ho le fetola mmuso wa hae; leo monna a na beiloe hodima lona, ka boikgethelo bo lokolohileng, ho ikgethela ka bobona mofuta oo ba o labalabelang wa bophelo. Mme ho bontsha se dutseng pelong tsa lona. Le a bona? Lentswe la hao... Lea tseba ke eng? Diketso tsa hao di hlodiya, hoo di pupetsang lentswe la hao.

<sup>156</sup> E re ke tjhakele monna. Mme ho thwe, “Oh, ke... Re Bakreste kaofela. Re ditho tsa kereke.” Homme ho fanyehilwe batho ba tsotseng hohle ofising ya hae? See a mpoleletseng sona hase etse phapang, ke tla tseba hantle ho feta moo; le lona.

<sup>157</sup> E re mosadi a re ke Mokreste, ka moriri o mokgutshwane? He-eh! Le tseba hantle ho feta moo, le a bona. E, monghadi. A ke a re ke Mokreste, a itakile ka pilo, le dishoto, mme a re ke Mokreste? Le tseba hantle ho feta moo. Lentswe la Modimo le o ruta hantle ho feta moo. Lentswe le re a ke se e etse ebe Mokreste. Ebile o tlotlolehole, le dintho tsohle. Modimo a ka kenya ntho e tlotlolehileng jwang mmusong wa Hae? Tjhe, monghadi, lekgale. Tjhe, monghadi. Ka bobona, ba bontsha takatso tsa bona.

<sup>158</sup> O ke ke wa re leeba le je le letlaka, lekgale. Ebile leeba ha le na nyooko. Le ke ke la ja setopo seo sa kgale. Ha le ka se loma hang, se ka le bolaya, mme lea tseba. Empa letlaka le ka ja ntho efe feela eo le e batlang. Le a bona? Le na le nyooko e ngata.

<sup>159</sup> Le fumana ke hona he, hore ho jwalo lefatsheng kajeno, ntho e tshwanang, “Ba feela, ba foufetse, mme ha ba tsebe.”

<sup>160</sup> Satane o e kgonne ka baka la takatso ya mosadi ho iphumanela tsebo, ya motabo, a e kgethileng ka boikgethelo ba hae. Jwale lemohang, ke Eva ya isitseng Adama bobeng, ke mosadi ya hlobotseng diaparo tsa hae pele Adama a hlobola tsa hae. Le a bona? Ke mosadi, kamehla. Esale ho le jwalo. Ho sa ho dutse ho le jwalo.

<sup>161</sup> Ke kereke e kgelosang monna. Ke kereke, lea bona, e tataisang monna ya batlang ho ba mora wa Modimo. Ke mosadi, kereke. E seng Bibele, Modimo, hobane Bibele ke monna. Oh, ee, “Lentswe le ne le etswe nama,” mme E ne e le Monna. Le a bona? Bibele ke monna; kereke ke mosadi. Le a bona? Hase kereke... Bibele e kgelosang monna. Ke kereke e mo kgelosang. Ke kereke eo a tsamaileng le yona a hlobotse, e seng Bibele. Le a bona? Tjhe, le ho leka. Bibele e mmolella hore o hlobotse. E, monghadi.

<sup>162</sup> Jwale lemohang jwang, ka motabo, takatso ya motabo, a lakatsa tsebo, ho tseba see ntho ena e ne e le sona, le mokgwa, hore tholwana ena e ne e le monate kapa tjhe. Mme a e etsa.

<sup>163</sup> Modimo o tla e kgutlisetsa tsatsi le leng, leha ho le jwalo, ka Monna. E ne e telwe ke mosadi. Empa e lopolotswe ke Monna; Monna, Jesu Kreste, e leng Lentswe.

<sup>164</sup> Mme jwale ke eng? Lemohang, ho kwaleng. Hase kgale haholo mona, ha ke etsa tlhahiso ena. Ke saletswe ke maqephe a mane kapa a mahlano mono, empa ke... a Mangolo le dintho tse ke ne ke batlile ho bua ka tsona. Empa, mamelang. Ha re kwaleng, ka ho bua sena.

<sup>165</sup> Lea hopola, hase kgale haholo mona, ha ke ne ke le ruta ka Diterompeta tse Supileng, mokete wa diterompeta, le dintho tse jwalo. Mme ka re, "Ho na le phutheho ya letsatsi la borobedi." Ha ho le jwalo, letsatsi la bosupa e tla ba la ho qetela, e tla ba Dilemo tse Sekete. Empa ho na le phutheho ya letsatsi la borobedi; etswe, ha eba e ne e le la borobedi, mme ho na le matsatsi a supileng feela, hoo ho boela ho le etsa letsatsi la pele, ho kgutlela tsatsing la pele hape. Jwale he, hoba Dilemo tse Sekete di fele, ke moo ho tla boela ho hlongwa Edene hape. Mmuso o moholo wa Modimo o tla kgutlisetswa. Hobane, Jesu o Iwanne le Satane, tshimong ya Gethsemane, mme a boela a hapa Edene; etswe, A tsamaile ho ya lokisa Lehodimong, ho kgutla hape, hodimo Lehodimong. O itse, "Dipelo tsa lona di se ferekane."

<sup>166</sup> Mohla A na a le lefatsheng mona, O itse, "Lona, ba-Juda, le dumetse ho Modimo. Jwale, Kea tseba Ke na le lebitso le lebe," A rialo. "Mme ba Mpitsa sena, sane, se seng. Empa, le dumetse ho Modimo; mme jwalokaha le dumetse ho Modimo, le ho Nna le dumele." E ne e le Modimo, a bonahaditswe. Le a bona? "Le boele le dumele ho . . ."

<sup>167</sup> "Ka tlung ya Ntate ho na le . . ." Kapa, "Moruong wa Ntate, meaho e mengata mererong ya Ntate. Ke sa tla ya lokisa bodulo." Shebang o bolelele bo bokae, ke disekwere tsa dimaele tse sekete le makgolo a mahlano! Ho ka thwe, o hokae? O ile ho ya o lokisa. Ke Mmopi. O bopa gauta eo yohle. Diterata dia bonaletska. Ke Mmopi. O ntse a etsa sebaka. Kwana ho Tshenolo 21, o itse, "Mme nna Johanne ka bona Motse o halalelang, Jerusalema e Motjha, o theoha ho Modimo Lehodimong."

<sup>168</sup> "Lewatle le ne le le siyo; lehodimo la pele le lefatshe la pele di ne di fetile." Mahodimo a rona a pele e ne e le afe? E ne e le Dilemo tse Sekete. Lefatshe la pele ke lefe? E ne e le lona lena. Le tla ntjhafatswa. Jwalokaha le ne le kolobetswe ke Noe, mehleng ya theroy hae; la halaletswa ke Kreste, ha A ne a le fafatsa ka Madi a Hae; le ho ntjhafatswa, ho tlosa dikokwanahloko tsohle tse hodima lona, ntjhafatsong ya ho qetela, ka kolobetso ya Mollo e tla bolaya dikokwanahloko tsohle, lefu ka leng, boletswe ka bong, ditshila tse ding le tse ding tse kileng tsa dula hodima lefatshe.

<sup>169</sup> Le tla phatloha, mme ho hlahe Lefatshe le Letjha. "Mme ka bona Lehodimo le Letjha le Lefatshe le Letjha. Lehodimo la pele, lefatshe lena la pele, le ne le fetile; mme lewatle le ne le le siyo. Mme nna Johanne ka bona Motse o halalelang, Jerusalema e Motjha, o theoha ho Modimo Lehodimong." Teng Modimo o tla dula le mehopoloy Wona ya nnete, bara le baradi, moo A ka qoqang le bona ka kgalalelo, mahlo a bona a foufaditswe sebeng ka seng. Sebe ha se sa tla ba teng ho tloha mono.

<sup>170</sup> Ha re hatelleng ka matla; le se ke la thetswa tsatsing lena, empa, "le phehelle ho kena ka kgoro."

<sup>171</sup> “Hoba kantle ho tla sala bafebi, le ba lakatsang.” “Ya shebang mosadi ho mo lakatsa o se a mo febile.” Bohle ba...kantle ho tla sala basadi ba mekgwa e mebe, banna ba mekgwa e mebe, le ba jwalo.

<sup>172</sup> Mme ke ba lopolotsweng feela, le ba Bukeng ya Bophelo ya Konyana, ba tla kena ka kgoro. Ka baka leo le hatelle, metswalle; le se ke la thetswa tsatsing lena la morao.

<sup>173</sup> Ena ke nako e kgolo. Motho e mong le e mong o na le tjhelete. Motho e mong le e mong a ka etsa *sena*, mme motho e mong le e mong a ka etsa *sane*, mme tjhelete e tsholoha ka nqa tsohle, le makoloi a maholo, le ntho tsohle. Ha ho sa tla sala le e nngwe ya tsona Motseng oo. Ho ke ke ha ba le koloi e le nngwe, sefofane se le seng. Tjhe. E tla ba tswelopele e fapaneng ka bottlalo. E tla boela eba tswelopele e seng ya tsebo, e seng ya saense, empa ya hlweko, le tumelo ho Modimo o phelang.

<sup>174</sup> Ha re phehelleng ho kena Mono. Hoba oo ke morero wa ka wohle, ke ho kena Motseng oo tsatsi le leng; le ho hetla feela, ho bona e mong le e mong wa lona a hwanta, ho tla le nna, ha re ntse re bina, “bahalaledi ba hwanta ba kena.” Ke batla ho ballwa palong eo ha bahalaledi ba hwanta ba kena.

#### Ha re rapele.

<sup>175</sup> Ntate ya ratehang ya Mahodimong, e re matsatsi a sa phetheha, mme re le bona le atamela, tshepis e a atamela. Rea rapela, Modimo o Ratehang, U tle u e behe dipelong tsa rona, re tle re se etse phoso ya letho. Modimo o Ratehang, baballa matswalo a rona a hlwekile. Boloka dipelo tsa rona di kgurumeditstswe, Morena, mahlo a rona a kgurumeditstswe dinthong tsa lefatshe, le dinthong tsa mafeela tsa lefatshe, tlotliso ya lefeela ya ho batla ho ba monna ya itseng e moholo.

<sup>176</sup> Ho sa tsottelehe ba baholo ha kae, marena wohle, dikgosi, babusisi, le ntho ka nngwe e tlamehile ho timela, mme ba ke ke ba tsoha ho ya bob-... tsohong ya pele. Hoba ho ngoditswe ho thwe, “Ho lehlohonolo ho halalehile ya nang le kabelo tsohong ya pele, lefu la bobedi ha le na matla hodima yona.” Oho Modimo! “Lefu la bobedi,” lefu la moyo, “ha le na matla”; o lopolotswe!

<sup>177</sup> Oho Modimo, ho nahana hore ho e nngwe ya dihora tsena, e mong o tla be a tjhaketse e mong, mme ba nnkuwe. “Ba babedi diphateng; ho tla nnkuwa e mong, mme ho siiwe e mong. Ba babedi masimong; Ke tla nka e mong, le ho siya e mong.”

<sup>178</sup> Oho Modimo, re thuse ho hlweka e—e mahlong a Hao, Morena, ho sa tsottelehe seo motho a se nahananang ka rona, seo batho ba bang ba se buang. Morena, a kgalalelo ya rona...dipolelo tsa rona di hlweke. Di ke di nokwe ka Lentswe la Modimo; ho nokwa hona, Morena, hoo ho sa tlo fumanwa mano ho rona. Ere re sa qela, ka baka la ditlolo tsa rona, hore Madi a Jesu Kreste a ke a kene dipakeng tsa rona le

Modimo, A tle a re nyarele ka Madi a Jesu; e seng ka ho loka ha rona, kapa ka hore re bomang, seo re se entseng, empa ka mehauhelo ya Hae feela. Modimo, fana ka sena!

<sup>179</sup> Ho se be le a dutseng mona bosius bona a utlwile Molaetsa, ho se be le a lahlehang hara bona, ho qala ka ngwana e monyenyan e ho isa ho motho e moholo. Takatso ya bona e halalelang e ke e be bakeng sa Modimo a nnotshi le Lentswe la Wona. Ha re tsebe hora eo A ka hlahang ka yona, kapa hora eo A ka tshohang a re biletsha ho arabela hodimo kwana Kahlolong. Ha re tsebe hora eo A ka tshohang, jwalokaha ho kile ha etsahala, a tlosa karete ya rona rakeng, ho re, “Ke nako ya ho tla hae. O tlamehile ho tsamaya.” Modimo, re thuso ho dula re hlwekile. Fana ka sena, Morena.

<sup>180</sup> Re ke re phele ho fihlela ho Kgutla ha Morena, ha e le ntho e ka etswang. Re ke re etse hohle ka bokgoni bo matleng a rona, ka lerato le kutlwisiso, kutlwisiso ya hobane Modimo o hlahloba lefatshe, kajeno, ho fumana nku e nngwe le e nngwe e lahlehileng. Mme re ke re bu le bona ka thapelo e nokilweng ya lerato le Lentswe la Modimo, re tle re fumane ya ho qetela, re tle re kgone ho ya Hae, le ho tswa Edeneng ena ya kgale ya Satane mona, Morena.

<sup>181</sup> E hahilweng hodima takatso yohle, le basadi ba batle, ka moo ba bitswang kateng lefatsheng, ka dipapatso tsa bona mono, “Rea bapatsa, re batla bashanyana ba tshasitseng konfeiti difahlehong tsa bona, le banana ba batle ba apereng ditshoto,” hantle diyalemoyeng tsa rona le dithelebischeneng; le ditshila tsohle tsa mafuta le gaum, le Hollywood; le mese ya basadi e tjhatjhehisang, ya mafuta yohle, e ditshila. Le—le banna ba kgopamiswang mme ba inkela diaparo tsa basadi, mme ba kuta meriri ya bona jwalo ka basadi; le basadi jwalo ka monna.

<sup>182</sup> Oho Modimo, re phela horeng e tshabehang hakakang! Oh, tloo, Morena Jesu, tloo! Tloo, Morena! Re hlwekise ka Madi. Tlosa ditshila tsohle le mano ho rona. Re ke re phele, Morena, re phele tlasa Madi, re se phetse, ka pela Hao. Ke takatso ya pelo tsa rona, le qelo ya rona e tshepehang.

<sup>183</sup> Modimo o Ratehang, ho robetse mona kala- . . . kapa mono, deskeng, bosius bona, moo Evangedi e ne e beilwe teng. Morena, mona ho robetse masela le diphasela tse yang ho bakudi le ba mahlomoleng. Thapelo ya tumelo, Morena, e ke e theohe e tswa dipelong tsa rona jwale, ho fihla ka pela sefahlaheho sa Hao. Jwale he, Morena, ha ho na le ntho e sa hlwekang ka ho rona, Morena, nka rona . . . re ise kahlolong jwale; mme re qela mohau. Re senolele se phoso seo re se etsang, Morena, re tle re kope, ho nka Madi le ho re hlwekisa. Phekola batho bana ba kulang le ho ba fodisa, Ntate, hohle moo e yang teng, hohle moo di yang. A ho be jwalo, Ntate.

<sup>184</sup> Re fe boikikitlelo ho U sebeletsa, homme Wena o nnotshi. Fana ka sena, Morena.

<sup>185</sup> Fana ka polo keho bathong bana ba leetong la bona le kgutlelang hae.

<sup>186</sup> Ho U leboha kamoo U fodisitseng batho kateng. Le moshanyana wa Kgaitedi Shepherd le Moena Shepherd, ya lemaditsweng ke baesekele, ke a rapela ho se fihle bobe ba letho mono; thakanyana le palameng baesekele ya lona, ke rapela hore a tle a itokele. Re U leboha ka ho fodisa ha Hao ba bang bana bao re ba kopetseng. “Mme rea tseba hobane seo re se kopang, rea se amohela, hoba re na le tshepo ho Ya entseng tshepiso.”

<sup>187</sup> Re fe mohau wa Hao, Morena, le ho tshwarela dibe tsa rona, re kopa ka Lebitso la Jesu Kreste. Amen.

<sup>188</sup> Lea Mo rata? [Phutheho e re, “Amen.”—Mong.] Le dumela ho Yena na? [“Amen.”] Ana lea kula le kgathaditswe ke mmuso wa Satane? [“Amen.”] Na lea dumela Dilemo tse Sekete di a tla, ho atamela Dilemo tsa Hae tse Sekete; tsa Hae, Edene ya Hae? [“Amen.”]

<sup>189</sup> Lea dumela hore e bopilwe kajeno? Shebang, ntho yohle e theilwe hodima mahlale. Tsohle, ntho yohle, e tlamehile ho pakwa ka mahlale pele ba ka e dumela.

<sup>190</sup> Homme o ka sitwa ho paka Modimo ka mahlale. O tlameha ho Mo amohela ka tumelo, “Hoba ya tlang ho Modimo e ka kgona a dumele hore O teng, le hobane Ke moputsi wa ba O batlang ka ho loka.”

<sup>191</sup> Oho Modimo, ha ke batle ho tseba letho ha e se Madi a Jesu Kreste a ntlhatswang sebeng. Ha ke tsebe letho ha e se Jesu Kreste. Mme jwalokaha Pauluse wa mehleng a boletse, ke rialo le nna bosiung bona, “Ha ke tsebe letho hara lona, ha e se Jesu Kreste a nnotshi, homme Yena ya thakgisitsweng.”

<sup>192</sup> Ke phetho seo ke tsebang ho le bolella sona. Ho re, Bibele ena, ke dumela ka pelo yohle ya ka (ha ke fela ke tseba pelo ya ka), hore ke Lentswe le phethehileng le sa tswakwang la Modimo. Ke phela ka Hona. Ke eme le Hona. Mme leha nka fumana maphelo a dikete tse leshome, nka thabela ho neela karolwana e nngwe le e nngwe ya bona Lentsweng lena, hobane ke Lentswe la Jesu Kreste. Mme ha ke tsotelle kamoo ba lekang ho Le hanyetsa, hore ke mahlale a makae a lekang ho re ha Le tshepahale, le dintho tse jwalo. Ho nna, Ke yona feela ntho eo nka e tshepang lefatsheng, ke Lentswe lena. Ke wa ka. Kea Mo rata. Ha le etse jwalo na? [Phutheho e re, “Amen.”—Mong.]

<sup>193</sup> Ha sebe se le teng pelong ya hao, ha phoso e le teng pelong ya hao, ha ho ena le ntho, rapela jwale le ho kopa Modimo ho o tshwarela. Le nthapelle; ke tla le rapella. Modimo a le hlohonolofatse, ke thapelo ya ka eo.

Re be re kopane! re be re kopane!  
Modimo a o boloke re be re kopane!

<sup>194</sup> Na le a ratana? [Phutheho e re, “Amen.”—Mong.] Johanne o itse, “Bana ba banyenyane, le ke le ratane.” “Le ratane, hobane lerato le apesa dibe tse ngata.” Jwale ha re tsukutlaneng ka matsoho.

Modimo a o boloke re be re kopane!  
Re be re kopane! re be re kopane!

<sup>195</sup> Jwale le be mosa e mong ho e mong. E bang mosa ho batho bohole. Tshwara moahisane wa hao hantle. Ipoloke o se na sekodi Jesu a be a fihle.

. . . maotong;  
Re be re kopane! re be re kopane!  
Modimo a o boloke re be re kopane!

<sup>196</sup> Le a Mo rata? [Phutheho e re, “Amen.”—Mong.] Ke thapelo yaka eo. Le nthapelle; ke tla le rapella. Ke lokela ho kgutlela Tucson jwale. Mme ke—ke rapela Modimo ho le hlohonolofatsa bohole. Ha ke tloha mono ke ya Canada, le ho kgutlela Colorado; ho potoloha, ho potoloha, ho potoloha, le a bona. Ho fihlela . . . ? . . .

<sup>197</sup> Moena Tony o teng mono, mme ho hlahile ntho e kgolo. Hantle feela Vatican, Roma, ba batla tsoseletso, kopano, hore ke etele teng ho tshwara tsoseletso Roma, Roma. Ha se kgale a kgutlike. Batho ba kgobokane. Ba na le arena e kgolo mono, e dudisa dikete le dikete tsa batho, mme ba mpatilela tsoseletso. Ba batla ho bona kganya ya Morena tshebeletsong. Ha ke tsebe. Ke tla lokela ho rapela ka yona, ho bona se Morena a tla mpolella sona. Oh, kgidi! Hopolang, le rapele, rona bohole hammoho. Re sebeletsa . . .

Re lebeletse ho tla ha Mmoloki wa rona ya bokwang,  
Shebang, bonang mahlaku a feiga a talafala;  
Evangedi ya Mmuso'a Hae e fihletse chaba ka seng;  
Mme re haufi le bofelo, ho hlakile.

<sup>198</sup> Ana ho jwalo? [Phutheho e re, “Amen.”—Mong.]

Re tla tumisa Molaetsa' ho hlaha ha  
Hae ho bokwang,  
Hang O tla hlaha ka kganya, ho bollela enwa le bohole;  
Tsohang he, lona bahalaledi ba Morena, le otsela athe bofelo bo haufi,  
Ha re itokisetseng pitso eo ya qetelo.

<sup>199</sup> E tla fetela bophirima mme e boele e kalle e kgutla, ka le leng la matsatsi ana, hopolang feela. Ehlide e tla etsa jwalo. Mme hoo ke nnete. Ho fihlela mohlang oo:

Inkele Lebitso la Jesu,  
 Ngwana' maswabi le tlokotsi;  
 Le tla o thabisa le o tshedise,  
 Le nke, hohle mo' yang teng.  
 Lebitso le ratehang (Lebitso le ratehang),  
 O le monate-nate!  
 Tshepo ya lefatsho le thabo ya Lehodimo;  
 Lebitso le ratehang, O le monate-nate! (le  
 monate-nate!)  
 Tshepo ya lefatsho le thabo ya Lehodimo.  
 Lebitsong la Jesu ba inama,  
 Ba namalla maotong a Hae,  
 Kgosi'a dikgosi Lehodimong re tla Mo tlotla,  
 Ha eto la rona le fedile.  
 Lebitso le ratehang, O le monate-nate!  
 Tshepo ya lefatsho le thabo ya Lehodimo;  
 Lebitso le ratehang, O le monate-nate!  
 Tshepo ya lefatsho le thabo ya Lehodimo.

<sup>200</sup> Jwale, temaneng ena ya ho qetela, ha re e bineng ka dihloho tsa rona tse inamisitsweng jwale.

Inkele Lebitso la Jesu,  
 E le thebe difing tsohle;  
 Ha diteko di o teela hare, (ntho tsena tsa  
 mmuso wa Satane, o a bona, o a bona)  
 Budula Lebitso le halalelang leo thapelang.

<sup>201</sup> Ke phetho; o ntoo itsamaela. Lea sebetsa. Nkile ka e leka.  
 Ako e dumele feela jwale, hobane e tla sebetsa. Budula Lebitso  
 la Hae le halalelang thapelang.

. . . Lebitso la Jesu,  
 E le thebe difing tsohle;  
 Ha diteko di o teela hare, (O etsa'ng he?)  
 Ak'o budule Bitso le halalelang leo thapelang.  
 (Lesira le tla kgurumetsa fahleho sa hao he.)

Lebitso le ratehang (Lebitso le ratehang),  
 Oho le monate-nate!  
 Tshepo ya lefatsho le thabo ya Lehodimo;  
 Lebitso le ratehang, Oho le monate-nate!  
 Tshepo ya lefatsho le thabo ya Lehodimo.

<sup>202</sup> Ha re inamiseng dihlooho tsa rona jwale, ke sa kopa  
 Moena Beeler morao mono ho tla kwano kalaneng. [Moena  
 Branham o qala a binela *Inkele Lebitso la Jesu* ka  
 marameng—Mong.]

Budula Lebitso la Hae le halalelang  
 thapelang.

<sup>203</sup> Ako re qhalanye, Moena Beeler. Ako re qhalanye ka  
 thapelo.

Lebitso le ratehang,  
 Tshepo ya lefatshe le thabo ya Lehodimo;  
 Lebitso le ratehang (Lebitso le ratehang),  
 Oho le monate-nate!  
 Tshepo ya lefatshe le thabo ya Lehodimo.

<sup>204</sup> Jwale ka dihloho tsa rona tse inamisitsweng, le ka dipelo tsa rona tse inamisitsweng. Moena Beeler, e mong wa batlatsi ba rona mona, Moena Estle Beeler, moena ya kgabane wa Mokreste, monna ya tshepehang. Ke tla mo kopa hore na a ka qhala mokgupi, bosiusng bona, ka thapelo. Modimo a o hlohonolofatse, Moena Beeler.



*EDENE YA SATANE SST65-0829*

(Satan's Eden)

Molaetsa wona o tlileng ka Moena William Marrion Branham, o rerilweng tshimolohong ka Senyesemane ka Sontaha mantsiboya, Phato 29, 1965, mane Tabernakeleng ya Branham, e Jeffersonville, Indiana, U.S.A., o ntshitswe mabanteng a kgatiso a makenete mme o ngotswe o sa kgutsufatwa ka Senyesemane. Phetolelo ena ya Sesotho sa Borwa e phatlaladitswe ka 2006 ke ba ha:

©2006 VGR, ALL RIGHTS RESERVED

VOICE OF GOD RECORDINGS  
 P.O. Box 950, JEFFERSONVILLE, INDIANA 47131 U.S.A.

## Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangeli ea Jesu Kreste. Buka ena e ke ke ea rekisoa, ea boela ea hilahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)